

ክድመት ዓፍየት ዲብ አቅሊም ቅብለት በሐር ቀየሕ



ዲብ አቅሊም ቅብለት በሐር ቀየሕ፡ እግል ደማን ዓፍየት መዋወኒን ዲብ ብንዩት ትሕትዩት፡ አላት ወመቅደረት አዳም ለገብአት ክስአት ረአሰማል ፍገራት ሰኔት ከም ትረከበት ምን ትቀየሙ

ዲብ የም 2 ፌብሩዌሪ እት መዲነት ባጸዕ ዲብ ገብአ እጅትማዕ፡ መሰሉል ፈርዕ ወዛረት ዓፍየትለ

አቅሊም ዶክተር የውሃንስ ተክሰቱ፡ መካሪት ጆግራፍየት፡ ሓላት ጀው ወመናበረት ሰብክ ወሰግም እግል ሰብ መቅደረት ክቡድ ምንመ ገብኤ፡ እግል ዓፍየት ወሀወፍት ሕማማት ዶር አንፋር ለልትሐመድ ከም ዐለ ሸርሐ።

ዲብ ገብአ ተቅዩም፡ ዲብ እምባትካለ ወኢረፋይሌ መአሰሳት

ዓፍየት ሐዲስ ከም ትብኑ፡ ዲብ አዶብሐ ወቃምጩወ አምቡላንሳት ሐዲስ ከም ትዳሉ፡ እብ ደረጃት አቅሊም ዝያድ100 ሐዳይስ ሰብ መቅደረት ዓፍየት ከም ትወዝዐው፡ እሰብዓልየት ባጸዕ፡ መርከዝ ተእሂል ግንዳዕ ወዕያደት በቅለ አትሳናይ ከም ገብአ እትን ልትወዳሕ ዲብ ሀሉ፡ ዲብ በ'ደ መርከዝ ዓፍየት

እግል ልትብኔ መትዳላይ ጋብእ ከም ሀለ ተሐበረ።

ወዚረት ዓፍየት አሚነ ኖርሕሴን ዲብ አሰመዐተ ከሊመት፡ ዲብ ሐልፊ ሰናታት፡ ዲብ ክሉ መጃላት ዓፍየት ርክብት ለሀሌት ዐውቱ ፈድል መሻረክት ሸዐብ ወሰብሸርክት ከም ቱ እንዴ ሐበረት፡

ወዛረት ዓፍየት መቅደረት አዳመ እንዴ አደቀበት ወአሳሲ አላት እንዴ አዳሌት እብ ትወድዩ ለሀሌት ወራታት ዲብ ደማን ለበ በቃዐት ብጹሕ ከም ሀለ አፍሀመት።

ወዚረት አሚነ እንዴ አትሌት፡ ወዛረት ዓፍየት ምን ሰነት 2017 አሰክ 2021 እግል ትብጽሐ ኢትንት ለሀሌት ስታት እግል ልትሐቀቅ፡ ዲብ ጠወሮት መቅደረት አዳም ዝያድ ክስአት ረአሰማል እምብት ከም ሀሌት እንዴ ሐበረት፡ ብዝሓም ሰብ መቅደረት ዲብ ኩብ፡ ሀንድ፡ ወብዕድ ለትወቀለት አብካት ተዐሊም ልትሀየብ ከም ሀለ አፍሀመ።

ሓክመት አቅሊም ቅብለት በሐር ቀየሕ አሰይደ ጽጌሬደ ወልደገገሰ ሀይ፡ እዳረት አቅሊም፡ ምስል ወዛረት ዓፍየት እንዴ ተዓወነት ትከድም ከም ጸንሐት ወእግል ትክደም ከም ቱ እንዴ ሐበረት፡ ሰብ መቅደረት ናይ ዶሉ መሻክል እንዴ ከሀለው፡ ምህንዮም ለተአረፍዎምተ መስሉልየት ክብድት እግል ለአትምም አትፋቀደት።

ዐንሰቡ፡ 80 ሻብ ምህነት ረክበው

መድረሰት ተእሂል ምህናት አቅሊም ዐንሰቡ ምን 8 እዳራት ደዋይሕ መዲነት ከረን ለመጽአው ግዱዓም፡ ምስኩናም ወሬፍዐት ዓይላት ሹሀይ ለብእቶም 80 ሻብ ለትፈናተ ምህናት አድረሰት።

ለእብ ወዛረት ተዐሊም ወሰብ ሸርከተ ለትዝመ ተእሂል መደት 8 ወርሕ ለተሀየብ ዲብ ገብኤ፡ አሽቃል ኮላት፡ አክቤ ፍገራቱ፡ መዲድ ክጡዋ ከሀረበት ወአምር ኮምፕዩተር ለከምከም ቱ።

ዲብ የም 4 ፌብሩዌሪ ዲብ ገብአት ዓደት መድሐራት፡ ወዚር ተዐሊም አሰይድ ሰመሬ ርእሶም፡ እብ አሰምዐየ ከሊመት፡ ለተእሂል ፈድል መዓወነት ወመትሰባለ ሰርገለው ዲብ ደረጃት ሰኔት ከም በጽሐ እንዴ ሐበረ፡ ዲብ መጽእ ወክድ ቅሩብ ክእነ ለመሰል በርናምጃት

ዲብ አቃሊም ጋሽብርኩ፡ ቅብለት በሐር ቀየሕ ወግብለት በሐር ቀየሕ እተክምሰልሁመ አቅሊም ግብለት እግል ለአተላሌ ከም ቱ ሸርሐ።

መሰሉል ፈርዕ ወዛረት ተዐሊም አቅሊም ዐንሰብ እስታዝ ሐጎስ አድሐነ ሀይ፡ ለተእሂል፡ ደረሰ እብ ቀሊል ዲብ ድዋርም ለልትንፍዖ እቡ ወእተይ እቅትሳድ ለረክቦ ምኑ እንዴ ተአመረ ከም ትሀየብ እንዴ ሐበረ፡ ዲብ መጽእ ለትደሐረው መበገስ ለገብእ አላት እግል ልትሀየቦ በርናምጃ ከም ሀለ ወድሐ።

እሊ ክእነ ዲብ እንቱ፡ ወዚር ተዐሊም አሰይድ ሰመሬ ርእሶም፡ እብ 3.4ሚልዮን ነቅፈ አትሳናይ ለገብአ ዲብ ናይ እትሳል ብንዩት ትሕትዩት ለትመደደ ዲብ ዝያድ 70 ሰነት ለወደ መብክ ፈርዕ ወዛረት ተዐሊም አቅሊም ዐንሰብ ገንሐ።



ምግብ፡ ጽርግያታት ልትከደም

እት አቅሊም ምግብ ምዴርየት ሰረጃቀ እብ ረድምየት ትትሸቁ ለጸንሐት ገበይ ወኪዋግር በሰዘ ተምም ዲብ ሀሌት ከዋ ቤት ገርግሸ - ዐዲ ንፋስ ሰኔ ገይሰ ከም ሀሉ፡ መሰሉል መርከዝ ከራይዋ ወሐብሬ ሌተናል ኮሎኔል ጆሜትረ ጌታቸው በርሃጽዮን እግል ኤሪሻ ሐበረ።

ለእብ ማሸነሪ ለትሸቁት ገበይ ወኪዋግር በሰዘ፡ 22.6 ኪሎ ምትር ሪም ወ10 ምትር ስምዋ ለበ ዲብ ትገብኤ፡ መሐገዝል ዲብ ባየት ለሀለዩ ደገጊት

ወኪ፡ ዋግር፡ ደፈሬ፡ ዐደንገድ፡ ዓዘን ፡ ኳዚን፡ በሰዘ ወዐዲንፋስ እግል ተአርሄ ቱ።

እሊ ከዋ እሊ ቀደም እሊ ምን ባጸዕ እንዴ መጽአየ እብ ምግብ መዲነት አሰመረ እንዴ ሐልፊዩ ዲብ ብሎት ከረን ልትሓበረ ለዐለየ መካይን ሸሕነት ዐባዩ ለልትንፍዐ እቡ ሰበት ቱ ዲብ ደሐን ትራፊክ ዶር ዐቢ እግል ልቀድም ቱ። እምበል እሊ፡ ምን ቤት ገርገሰ እንዴ ትገብሰት እብ በሰዘ ወዐዲ ንፋስ እንዴ ሐልፊት ዲብ እንባደርህ

ምስል ገበይ ለዐባይ ለትትሓበር፡ 12.5 ኪሎምትር ለሪመ ወ20 ምትር ስምዋ ለበ ገበይ ዲብ ደረጃት ተሚም በጽሐት ከም ሀሌት፡ ሌተናል ኮሎኔል ጆሜትረ ጌታቸው ሸርሐ።

ለወራት፡ ዲብ መደት ሐጫር እግል ትትመም ከም ቱመትመቃራካይለ ለመሸርዕኩኔል ብርሃኔ ኤልያስ ሐበረ።

እሊ ክእነ ዲብ እንቱ፡ ሰነን ዐዲንፋስ ዲብ ሸቅል እግል ሻርት ለሀለው እግል ለአትናይት ሕራብ አዳለ እሎም።

ክብክብ፡ መንፈዐት መትከምከም እት ድጋ

እዳረት ደዋይሕ ክብክብ ምዴርየት አፍባቡ፡ ፍንጡራት ለዐለየ 850 ዓይላት እንዴ ትተምከመየ መናበረት ጣፍሐት እግል ልሳይረ ምን አንበተ፡ ተአምርተ መናፍዕ መትከምከም ደገጊት ጋብኡት ሀሉት።

ሐቀለ መትከምከም፡ መድረሰት እብትዳእየት ወምግባይት ደረጃት እንዴ ትተሰተት፡ ብዝሓም ሸባየት አሰክ ለትወቀለት ደረጃት ባዱሓም ከም ሀለው፡ እብ ጣቀት ጸሓይ ለሸቁ 4 መርከዝ ለበ መሸርዕ ማይ ሰበት ትብኩ፡ ሸዐብ ማይ ነዲፍ እግል ልሰቱ ከም ቀድራ ደክኪን፡ ጣሑናት እክል፡ አፍራም፡ መጣዕም ወብዕድ መአሰየት ሃይባት ከደማት ብኩይ እተ ክምሀለ መመቅራካይ ሸቅል ናይለ እዳረት ደዋይሕ አሰይድ እድረሰ ዐትምን ሐበረ።

ኔበረታሙ ጀራዲን እት ጠፋሐት መገዢ ዶር ዐቢ ከም አግደ እት ሸረሐ ሰይይት ወዛረት ሐርስ እግል ኢትትፈንቱም ትፋኑ።

እዳረት ደዋይሕ ክብክብ እት ኸዋ አፍባቡ፡ ነቅፈ እብ እንክር ቅብለት ምን መዲነት አፍባቡ፡ 15 ኪሎ ምትር ትረይም።

ኤሪትሮ- ሓለት እተይ ዮም ዓመት

ናይ ክል ሰነት ቅደስ ዝላም ኤሪትሮየ ወእብ ፍንቱይ ናይ መንጠቀት ቀር አፍሪቀ፡ ክል ዶል አክል- ታርፍ ኢኮን። ለአግደ ሓደን ዝላም እንትሻሩ ንዙም ኢኮን። እት ሒን ከረም ለትረከብ ዝላም እብ ዓመት ትጌመም እት ሀሌት፡ ሕድት አው ቅሩብ ዓድየትተ። እለ መንጠቀት እብ ጀሐር ድቁብ ለትደመዕ ዲቡ አውካድመ ሀለ።

ከ እለ መትነአከት ሓለት ድዋር ናይ እለ መንጠቀት፡ ሕኩማት ኬወ ሸዐብ እት አሸቃል ብንየት ተሕትየት ማይ ወመስኖ እግል ልነዝመ፡ ብዙሕ ለለአተላልየ ዲቡ በራምጅ ደማነት ነብረ እግል ለአፍግረ ክምሰልሁመ እግል ‘ተሌ ሰነት ለገብእ እክል እግል ልከዝነ መስኡልየት ተአረፈዐን።

ሕኩመት ኤሪትሮየ እሊ እት ሕሳብ እንዴ አቴት፡ እብ ፍንቱይ ምን ሰነት 2005 እንዴ አንበተት ደማነት ነብረ እግል ተአክድ ናይ ረዩም ወቅሩብ በራምጅ ኢትንት ሀሌት። ሀደፍ ናይለ በራምጅ፡ ጀሓር ዲብለ ለሀሌ ዲቡ አውካድ መደረቱ እግል ትድዌ(ትክረዕ)፡ ክምሰልሁመ ዲብለ እተይ ብርኩት ለልትረከብ ዲቡ አውካድ እብ ደረጀት አፍራድ መዋጥኒን ወእብ ደረጀት ወጠን ለከፊ እክል ከዘኖት ቱ። እሊ መቅሬሕ ሕድ ላቡ ወብዙሕ ለአጅሃቱ ሰትራቴጂ እትለ ሐልፈ ዕቁድ(10 ሰነት) እግል ክልኤ ሰነት እብ ሰብብ ጀሐር እግል ሳደፈ ግዱዕ እተይ አካን ደብአ።

ምናተ ዮም ዓመት ዲብ ኤሪትሮየ እብ ብዙሕ አሰባብ እተይ ብርኩት ርኩብ ሀለ። ዲብ ቀይም 2015 ዲብ ቀላቅል (አጸድፍ ምፍጋር ጸሓይ) ለዘልመት ዝላም፡ እት ልሑተ ዲብ ከበሳታት ለዘልመት ዝላም ሕድት፡ ዝያድ ኩሉ ሀይ ዲብለ አግደ ሒን ከረም በህለት ምን ጁን አሰክ ሰብተምበር 2016 ለዘልመት ዝላም እብ ዕን ጀግራፍያይ መትመዳድ፡ ንዙም ወእት ሒኑ ለመጽአ ዘላይም ክምቱ እት ሕሳብ እንዴ አተ፡ ከረም ቃዝረት ሓለፍነ እግል ልትበህል ቀድር። እሊ ሀይ ምስል ሒን አተዮት እክል ሰኒ ናሰበ።

እሊ ክእነ ዲብ እንቱ እብ ሰበት ሓለት ነብረ ናይ እለ መንጠቀት ፈግር ለሀለ ገሌ ኢራቴዕ ተቃሪር “ ዲብ ኤሪትሮየ ትርድት ግድዔ ነብረ ሱድፍት ሀሌት” እት ልብል ነሺሩ ለለትፈክርቱ። ለምን ረሕመት ትቀንጽ ሸቀላት እብ ገበየ ንትከበተ። ምናተ እሊ ነበሽ ለአለቡ ለመስል ሐምላት፡ ሀደፍ ኬልም ለሐመመ ክምቱ ክም ንአምን ለወዴነ አሰባብ ካፊ ኢሐገልነ።

ውዛረት እዕላም
02 ፌብራይር 2017
አስመራ


መቃበለት ርኢስ ኢሳይያስ አፈወርቂ እብ መናሰበት ሰነት 2017

ሓይላም ቄርአት ጀሪደት ኤሪትሮየ ሐዳሴ ርኢስ ኢሳይያስ አፈወርቂ፡ እብ መናሰበት ሰነት ሐዳሴ 2017፤ ሄራር በራምጅ ዐማር እቅትሳድ ወጠን፤ ተጠውራት መንጠቀት ወዐለም ለትከሰ መቃበለት ረሓብ ዋዲ ሆለ። ከአትለ ጥብዐት ዮም፤ 2ይ ክፋል እግል ንቀድም እግልኩምቱ።

ሰኣል፡ ሓይሳ ርኢሴ ምን ዐባዩ አሕዳስ ሰነት 2016፤ ወሰክ ማህየት ሸቃለ ሕኩመት ቱ። ላኪን እግል ኩሉ ለሸምል ዝላም ማህየት አሰክ እለ ጋብእ ኢሀለ። ሚ ዶል እግል

እሊ ለሀደግናሁ ዝዘፍ መጃላት እቅትሳድ ደቅቡ እግል ልትአከድ ብእቱ፤ መናበረት መዋጥኒን እግል ለአሰኔ ለቀድር እቅትሳድ ዶል ለዐቤ ወልትቀደምቱ። ማህየት ሰኔት ለትብለ፡ ሐለት መትዛባዩ ድቅብት ዶል ትገብእ ሌጣ ቱ። እሊ እት ወግም እንዴ አቴነ እግል ንሸቄ ብነ። ወሰክ ማህየት ሌጠ ኢኮን ለወቀይ። አዝማት ናይ እቅትሳድ እግል ለሀሌ ቀድር እብ ለትፈናተ አሰባብ ምናተ፡ መናበረት መዋጥኒን እብ ኩሉ መቃዩስ ዲብ ሰኔ እግል ቲጊስ ሰበት ቤ

እንወድየ ለሕፍዝ እግል ኢንትጌኒ እብ ምልሃይክ እግል ልግበእ ቡ። ፈዓልየታመ እብ መራሕል ተ ለትገብእ። ቀደም ኩሎም ሸቃለ ሕኩመት እብ ዓመት፡ አውለውየት ናይለ ማህየት ሀይ አንፋር ዴሽ፡ ፖለስ ወአምን ህይብት ህሌት። እሊ ዐደዱ፡ ክድመቱ፡ ገዲሙ ወዲብ ወቀይ ለሀለ ምኑ ኩሉ እንዴ ትጫረ እብ ዓላብ ሰጁል ሀለ። እበ ዓዲ ሸቃላይ ነአንብት፡ ለበዝሐው ዓዲ-ሸቃለ ሰበት ቶም። ምን ዴሽ ልግበእ ወዲብ መአሰሳት ሸቄ ለሀለ



ልትመም ቱ? ምስል ክፍለ ማህየት ሀይ፡ ለአግደ ሕሱብ እቱ ለሀለ ጋር ናይ ደረጀት ምህር መስል። አትሐዘዮት እሊ ምህም ምንግ ቱ በቃዕት ሸቅል፡ አፍሪዮት ወአግደምየት ሸቅል ወግም እግል ልትህየቡ ወኢወጅበ ገብእ? ምስሉ ለገይሰመ አደቃብ እንድግዮ ሸቅል ወአፍሪዮት ቱ። እብ ክሰሳ እሊ ሚ ተውዲሕ ተህይበን?

አትሳናይ ማህየት እኑቡት ሀለ፡ እብ ተማመ ሚ ዶል ቱ እት ፍዕል ለልተርጀም ምን ትብለኒ ላኪን፡ ከንዶእ ሌጣ ቱ በለሰይ። ለአምረ ላኪን፡ ለጸብጣመ ህሌን ገበይ እበ ከአፎ ገይስ ክም ሀለ፡ አሰክ አየ ሀይ ልሄርር ሀለ ወአትሳላጡ ሀይ ሚ መስል ለልብል ጋራት ቱ። ማህየት እግል ነአሰኔ እንቀድር፡ እብ ዓላብ አትሳኔነ ኢኮን ሊጋር። ሊጋሪት ዐለቦት ሰላዲ እብ ነቅፈ እንዴ ኢገብእ፡ ለነሰአካህ ማህየት ሚ እግል ተአትዛቤክ ትቀድር? ቤት ተአትካሬክ አው ተአሸቄክ? አምዕላይ ወራታት መናበረትክ እግል ተአጥፊሕ እበ ትቀድር መ ኢፋሉ? ለነቅፈ ሐለተ እት ሱግ ከአፎ ህሌት፡ በዲር 700 ትነሰእ ለዐልኩ፡ አዜ እት 1500 ነቅፈ ወምለዐሉ ትወቀልክ እንዴ ኢገብእ፡ ዎሮት ነቅፈ ምን ሱግ ሚ እግል ለአትዛቤክ ቀድር ተ ለተህምም። እግል አትናያት ማህየት ትትወሰክ ህሌት እንዴ ኢገብእ፡

ምንለ ትደሀረ ዔማት እተይ ቡ ለልትበህል አሰክለ ትወቀለ እተይ ለቡ መዋጥን፡ መናበረቶም እግል ትትሳባይ ገብአት ምን ገብእ፡ ሱዉይ ንዝም ማህየት እግል ነአሰብቅ ብነ። ቀደም እለ ዲብ እቅትሳድነ የም ለአለቡ መሐለኪት ሳድፍ ዐለ። ዎሮት ምን መሻክሉ ሀይ፡ ረብሸት ቀሎት ሱግ (Speculation) ቱ። ብዙሕ መሐለኪት እግል ለሀሌ እሉ ቀድር፡ እሊ ሀይ እት መናበረት ሸዐብ ለክልቁ ጨቅዋ ቀሊል ኢኮን። ዶል ተአትመጣውር ላኪን፡ ዝያድ ለልትደመዕ ለእብ ማህየት ሕኩመት ለልትናበር መዋጥን ቱ። እሰልፍ ሀይ እለ ማህየት እግል ትሰኔ ክም ቤ ለልአትክሕድ አርእሰመ ኢኮን። ለአርዛቅ አክል አዩ ቱ ወእብ ከአፎ እግል ትካፍሉ ክም ትቀድር ብዙሕ ለልአትክሕድ ጋር ኢኮን፡ ሰበቡ ናይ መግህፍ እቅትሳድ ወሕኩመት ኢኮን እሊ። አርዛቅ ወጠን እት መዋጥኒን እብ መሳዋት እግል ልትባዳሕ ሰበት ሀለ እሉ፡ ወማህየትመ ሐቱ ምን አግቡይ አትመቃርሖት አርዛቅ ሰበት ቱ፡ ለውጾዕ ጸንሐ ክፋል መጅተመዕነ ለወጅቡ ሐቅ እግል ልርከብ ቡ። ማህየት እግል ትግበእ ቤ እሰልፍ እብ እሰወ ገበይ ወምን እሰወ ዔማት እቅትሳድ ክም

አዳም ለበዝሐው ለዓዲ ሸቃለ ሰበት ቶም፡ ለሐሴ አብነትመ እብ አውለውየት እግሉ እግል ልትህየብ ሰበት ወጅብ፡ (ለብዕድመ በክት ኢልትህየቡ በህለት እንዴ ኢገብእ)፡ እሰልፍ ማህየቱ ለትሰኔ እሉ መስኡል እንዴ ኢገብእ፡ ለድሀር ዓዲ ሸቃላይ ቱ። መስኡልየት ለቡ፡ ርተብ ለቡ፡ ግድምነ ለቡ ምን ጸኔሕ ለሐይሱ፡ ሐቅ አለቡ በህለት ኢኮን፡ ላኪን እሰልፍ እሎም ድሀራም ለህለው ሸቃለ እየም ነአሰተብዴ ትበህለ፡ 1800 ነቅፈ እግል ዓዲ ሸቃላይ ትበህለ። እብ አግደምየት ወእብ ርተብ ለትትወሰክ ማህየትመ መቃዩስ ሀለ እሊ። እብ አግደምየት ናይ 10፡ 20 ወ30 ሰነት እንዴ ትቤ እግል ትቀይም ትቀድር፡ ከልፍየት ምህር እግል ቲበል ትቀድር፡ ናይ ምህነቱመ እግል ትትሃጌ ትቀድር። ኮርፖራል ቱ፡ ተሌንቱ ቱ፡ ብራጋደር ጀነራል ቱ፡ መስኡል ናይ እሰወ መአሰሰት ቱ፡ እንዴ ትቤ ቱ ለትቀይም። ሰበት እሊ፡ ሕነ ምን ሕኔት ምለዐል እበ መስኡሊን ነአሰተብዴ፡ እበ ተሓትያም ምን ነአንብት ካብ ካርጀን ወህቱ ሰበት በዜሕ፡ ናይለ ተሓትያም ታምም ሀለ።

ዲብ ገጽ 4 ልተላሌ.....

እፈትርየዐጸላክ

ክል አርቡዕ ለትጠ'በዕ ጀሪደት
መዳልያይ፡
መሐመድ እድሪስ መሐመድ
ናይብ መዳልያይ፡
አድም ሳልሕ (አቡሐሪሽ)
ለይ-አውት፡
ዘህረ ዐሊ
ፋጥና አደም
ተለፎን፡ 121797
ፋክስ፡ 127749፡ ዕ.ሰ.ቡ፡ 247
ተውዝዕ ጀሪደት፡
ተለፎን፡ 200454
አትአመሮት፡
ተለፎን፡ 125013፡ ዕ.ሰ.ቡ፡ 1284



ቃኑን መምተልካት

ድድ ንዩት በዐል ሐቅ መትነፍቶት ኦርድ ለገብእ መትኢታይ ወሐቅ ዳፍቶት

በዐል ሐቅ መትነፍቶት ኦርድ፡ ማሉ እብ ኢቃኑን እት ዋከቱ ምነ ኣተ ኣው ለጸብጠ ነፈር፡ እግል ልብለሰ ኣው እግል ልዋለብ ቀድር። እግል ገብእ ናይ ገዲብ ኣፍዓል ሀዩ እግል ልትቃወም ቀድር። ለበዐል ማል እግል ናይ ገዲብ ፍዕል እትለ ልትቃወም ዲበ ኢነት፡ ዐግል ለሬመዩ ኣው ለልትሳነን ምንለ ኢኮን ናይ ዕምጽ ኣፍዓል እግል ልትሰለም ሀለ እሉ። እት ማል ብዕድ ላተ ኦርድየት እምበል ንዩት በዐል ኣው መቃወሙት ናይ ጸብጣይ ኦርድየት እንዴ ኬደ ዘርእ ለዘርእ ለገብእ ልግበእ ኣዳም እግል እተይ እግል ለኣቱ ኣው ለኣክብ ኢቀድር። ለእተይ ተኣክበ ምንገብእ ሀዩ፡ እብ ተማሙ ማል ናይለ ሐቅ መትነፍቶት ናይለ ኦርድየት ለቡ ነፈር ገብእ። በዐል ሐቅ መትነፍቶት ኦርድየት እግል ልትቃወም እትለ ኢቀድር ዲበ ኣለት ዐላመ ምንገብእ፡ ክም ትቃወመ እንዴ ተሐሰበ በዐል ናይለ እተይ ገብእ።

ምልክቶት ሕበር

ዎሮ መምተልካት ክልኡት ወምን ክልኡት ወለዐል ማልከት ሀለው እሉ ምንገብእ፡ ክም ናይ ሕበር ምልክቶት ልትነሰእ። ዲብ ክምእን ትመስል ኣለት ሐቅ ወዋጅብ ኣድሕድ፡ ሚልከት እብለ እት ፍንጊም ለትገብእ እትፋቅየት (ውዑል) ልትቀረር። ምናተ እታመ ውዑሎም ዝኩር ኢለሀሌ፡ እብ ቃኑን መምተልካት እግል ልታለዎ ለወጅብ ቢዮናት ሀሉ። እግል መሰል፡ ኦሮ ምነ ናይ ሕበር ሚልከት ዋከቱ እግል ለኣዝቤ ምን ለሐዘ፡ ለብዕዳም ሚልከት ናይለ ናይ ሕበር መምተልካት እግል ማል እግል ልትዛበው ኣውለውየት እግል ልትሀየቦ ሐቅ ቦም፡ ኣትመቃርሐት መምተልካት እበ ከሰሰመ እብ ሕበር እግል ልግበእ ሀሌት እሉ። ለኣንፋር ምን ክልኡት ወለዐል ዶል ገብእ ሀዩኒ ኣትመቃረሕ መምተልካት እብ ብዝሐ ኣሰዋት ልትሳደቅ ዲቡ። ለመምተልካት እግል ልትዘብሌ ገብእ ምንገብእ ላኪን ሰሚሕ ናይ ኩሎም ሚልከት እግል ለሀሌ ላዝምቴ። ዎሮ ምነ ሚልከት ለመምተልካት ሕበር እግል ኢልእኬ፡ መደረት እግል ኢትግበእ እቱ ኣው ፍሬሁ እግል ለዓቤ እንዴ ቤለ ተካሊፍ ወደ ምን ገብእ፡ ለፈግረ ማል ናይ ሕበር ዕዳይ ገብእ።

ሐቅ መትነፍቶት

ሐቅ መትነፍቶት እት መምተልካት ለለሀሌ ናይ

መትነፍቶት ሐቅቴ። መትነፍቶት ልትበሀል እት ሀለ ሀዩ እትለ መምተልካት ዋከት እግል ተሀሌ እኬ እግል ትነፈዕ እቡ ወተመቅርሐ ቀዲር በህለትቴ። ሐቅ መትነፍቶት ምን በዐል ማል ለልትሀየብክ ሐቅ ቴ። ለልትሀየብ ሐቅ ሀዩ እትለ በዜሕ ኣሰክ ሞት ለጸኔሕ ገብእ እት ሀሉ፡ ምን ቃልሰ ላኪን እግል መ'ደት መሕዱደት እግል ልግበእ ቀድር። እብ እትፋቅ ለተሐደደ ወቅት ኣለቡ ገኦ ምብገብእ ሀዩ፡ ለሐቅ መትነፍቶት ምስል ሞት ናይለ መትነፈዓይቱ ለለኣኸትም። መትነፍቶት እት ምልክቶት ለቀርብ ሐቅቱ እግል ልትበሀል ምንመ ቀድር፡ መትነፍቶት ምን ምልክቶት ለፈንትዮ ኣግደ ንቃዋ፡ ስሙ ክምለ ተሐብሮ ሐቅ መትነፍቶት ለረክበ ነፈር እግል መምተልካት እግል ልትዓወን እቡ ወምን ፈርያቱ እግል ልትነፈዕ እንድኢኮን፡ እግል ለኣዝብዮ፡ ልበድሎ፡ ክም ይቡቲት እግል ለሀቦ ኣውመ እት ዌርሰት እግል ለኣልፎ ኢቀድር። ሰበት እሊ ዎሮ ሐቅ መትነፍቶት ለትሀየብ ነፈር እግል መምተልካት እንዴ ትክበተ ምልክቶት ናይለ መምተልካት እት ነፈር ብዕድ እግል ለኣትሐላልፍ እንዴ ሐሰበ ውዑል ዝቤ ወደ ምንገብእ፡ ለእት ፍንጊም ገብእ ውዑል እብ ቃኑን ኢሰብት።

መትነፈዓይ እግል ምን በዐሉ ለትሰለመዩ መምተልካት እግል ልበድሎ ኣው ለኣክርቦ ኢወጅብ። ኣክል ሕድ ክም በዐል ኣማነት እግል መምተልካት ለተትሐዜ መራዓየት እት ወዴ እሉ እግል ልትዓወን እቡ ወጅብ። ምኑመ እንዴ ሐልፈ ለልኡትሐዜ ኣትሳናይ ኣው ኣትኣያሰ እግል ሊዴ እቱ ቀድር። በዐል መምተልካት ማሉ እበ መትነፈዓይ ከርብ ሀለ ወለኣኬ ሀለ መሰለ እቱ ምንገብእ ሐቁ እብ ቃኑን እግል ለኣርትዖ ቀድር። መትነፈዓይ ለመምተልካት ዲብ በዐሉ ዶል በልሶ ዐውል ናይለ እሉ ወደ ኣትሳናይ እግል ልዋለብ ቀድር። ለእሉ ወደ ኣትኣያሰ ዲብለ እብ ሐቅ መትነፍቶት ጸብጡ ለዐለ መምተልካት ወለ ሐቱ መደረት እንዴ ኢወዴ እግል መምተልካት ምነ ኣካን እግል ልርፍዖ ቀድር ገኦ ምንገብእ ላኪን፡ ማሉ እንዴ ረፍዐ እግል ልንሰእ ቀድር። እት ደንጎበ መትነፈዓይ ዐረድ ሐሉ እበ ገብእ ቴለል ኣው እግል ልንገፍ ምነ እበ ኢቀድር ብቐት ለመምተልካት ገሌ ክፈሉ ኣው እብ ተማሙ ከርበ ምንገብእ፡ እግል መምተልካት እግል ልክሐሰ

ኣው ክምለ እለ ዐለ እንዴ በልሰዩ እግል ልሰልሞ ኢልትቀ'ሰብ።

ሐቅ መትዓዋን

ሐቅ መትዓዋን ለልትበሀል ምስል ኦርድ ሌጠ ለትጸበጠ ሐቅቴ። መዕነቱ ሀዩ ሐቱ ኦርድየት እግል ብዕደት ኦርድየት እግል ተዓውን ጸብጠ ዶል ገብእ ቴ። እት ክምእን ትመስል ኣለት ለተዓውን ክም ኦርድየት መዓውናይት ወለትትዓውን ኦርድየት ሀዩ ክም ኦርድየት መዓውናይት ትትኣመር። እግል መሰል፡ ክልኤ እብ ባይን ሕዱድ ለልትፈናተየ ኦርድየት ሐርሰ ኮንቸሰዮኒ(ግረህ) እት ሐንቴ ሐቅ መትነፍቶት ናይ ክልኡት ለትፈናተው ኣንፋር ለሀልዮ። ለሰብ ሐቅ መትነፍቶት እግል ኣዳሞም ወንዋዮም ማይ ሲቶ ምን ሐቱ ዔለ ልትነፍዮ። ለዔለ ሀዩ እት ኦርድየት ናይለ ሐቱ ገርሀት ሀሌት። ለዲብ ኦርድየቱ ዔለ ለኣለቡ በዐል ገርሀት ምን ዔለ ናይለ ብዕድ መትነፈዓይ ኦርድየት እግል ልትነፈዕ ላዝም እንዴ ገብእ፡ እብ ብዕደት መሕለፊ ሐቅ ኣለቡ፡ ለገበይ መሕለፊት ለሀሌት ዲበ ኦርድየት እግል መትነፈዓይ መዓውናይት ትገብእ ዲብ ሀሌት፡ ለእት ሐንቴ ሐቅ መትነፍቶት መትነፍዓይ ለትረከብ ኦርድየት ሀዩ ኦርድየት መዓውናይት ትገብእ። ለናይ ዓወኖት ሐቅ ወዋጅብ ሀዩ ምስለ ኦርድየት እብ ሳብት ለልትሐላለፍ ወለገይሰቴ። ሰበት እሊ ዲብ እሊ መሰል፡ ለኦርድየት መዓውናይት እት መትነፈዓይ ብዕድመ ምን ትትዐዴ፡ ለሐዲሰ በዐል ሐቅ መትነፍቶት እግል መትዓውናይት ኦርድየት ክምለ እለ ዐለት እግል ትክደም ጸብጡቴ።

ሐቅ መትዓዋን እብ ከፎ መጽእ?

ሐቅ መትዓዋን እብ እሊ ተሌ ኣግቡይ እግል ልትከለቅ ቀድር። 1) **ሐቅ መትዓዋን እብ ውዕል ኣው እብ ፊኑ**፡ ሐቅ መትዓዋን እት ፍንጌ ጸብጣይ ሐቅ መትነፍቶት፡ ኦርድየት መትዓውናይት ወኦርድየት መዓውናይት እብለ ትገብእ እትፋቅየት እግል ልትኣሰስ ቀድር። ክምስልሁመ ዎሮ ሚልካይ ናይ ለኢልትሐረክ መምተልካት እብ ፊነ ፍንጌ ክልኡት ኣው ምን ክልኡት ወለዐል ዌርሱቱ መትነፋል ሚራሰ እተ ወዱ እቱ ውቀት ሐቅ መትዓዋን እግል ልትከለቅ ቀድር። ሐቅ መትዓዋን እብ ውዑል ኣው እብ ፊነ እብ

ክቱብ ኢተኣሰስ ምንገብእ ላኪን እብ ቃኑን ፈጽሞ ኣለቡ። እብ ተውሳክ፡ ሐቅ መትዓዋን እትለ ኦርድየት መዓውናይት ለትረከብ ዲበ ኣካን ኣው ባካት ዲብ ገፍተር ለኢልትሐረክ መምተልካት እትለ ትሰጀለ ዲቡ ቴለል ለትሰረረተ፡ እት ሳልሰ ገርብ ፈጽሞ ኣለቡ። እሊ በህለት ሀዩ፡ ለእብ ክቱብ ተኣሰስ ሐቅ መትዓዋን እት ገፍተር ለኢልትሐረክ መምተልካት ሰጁል ኢጸነሐ ምንገብእ፡ መትፈጸሙ ፍንጌለ መትወዓዕለት ጀሃት ኣው እብ ፊነ መትነፈዐት ለገብኣው ሰብ ሐቅ ጀሃት ሌጠ ድኢኮን፡ ለኦርድየት መዓውናይት እት ብዕድ ሳልሰ ገርብ ዲብለ ትትዐዴ እተ ኢነት ሐቅ መትነፍቶት ዲብለ ሐዲሰ በዐል ምልክቶት ኣው ጸብጣይ መምተልካት እግል ለኣጅብር ኢቀድር።

2) **ሐቅ መትዓዋን እብ ለትረከበ ሕዱድ ወቅት**፡ እምበለ እት ዕልብ ሐቱ ለተሀደገ እብ ክቱብ እግል ልትኣሰስ ላቡ ሐቅ መትዓዋን፡ እብ ለትረከበ ሕዱድ ወቅትመ እግል ልትከለቅ ለቀድር “ርኡይ ሐቅ መትዓዋን” ለልትበሀልመ ሀሉ። እሊ በህለት ሀዩ፡ ዎሮ በዐል ሐቅ መትነፍቶት ኦርድየት እብ ኦርድየት ናይ ነፈር ብዕድ እብ ደሚር ናሴሕ እግል 10 ሰነት ክም መትኣለፊት እንዴ ትነፈዕ ልትዓወን እበ ሐቅ ጸንሐ፡ ርኡይ ሐቅ መትዓዋን ለሀሌ እሉ። ርኡይ ሐቅ መትነፍቶት እብለ ትረከበ ሕዱድ ወቅት ለረክበ ለገብእ ልግበእ ኣዳም፡ ወሳዕት ናይለ መትዓዋን እብለ ለኣተብት ቃኑናይ ሰነድ ሀለዮት ናይለ ክድመት እግል ለኣክድ ክምስልሁመ፡ እለ ክድመት እለ እት ገፍተር ናይ ለኢልትሐረክ መምተልካት እግል ትትሰነድ እሉ እግል ልዋለብ ቀድር። እሊ እተ ሹብህ እብ ረኪብ ሕዱድ ወቅት ለትረከበ ሐቅ መትዓዋን ዲብ ገፍተር ለኢልትሐረክ መምተልካት ዲብለ ለኣቱ ዲቡ ቴለል ምን ኢገብእ፡ እት ሳልሰ ጀሀት እግል ለኣጅብር ኣውመ ተኣሰር እግል ሊዴ ኢቀድር።

እብ ተውሳክ ዲብ ሐቅ መትነፍቶት ልብ እግል ልትከፊ እቶም ለወጅብ እሉም ተሉ ጠባይዕ ፍንቲያም ሀለው፡

• ጽበጥ ሐቅ መዓወንተ ወእት ፍዕል ለልውዕል እቡ ዐገል እብ እትፋቅ ውዑል ተኣሰስ ልትሐደድ። ለውዑል እግል እሊ ለኸሰስ እትፋቅ ኣለቡ ገብእ ምንገብእ ሀዩ፡ እብ ናይለ ደዋሒ ነባሪ ልትሐደድ። ሸኩክ እትለ ለሀሌ እተ ኣለት ሀዩ፡ እምበለ

መቃወሙት ወእግል መደት ረያም እብ ገሌ ዐገል እብ ደሚር ናሴሕ ልትሸቄ እቡ ለጸንሐ ነባሪ ህቱ ለሐድዶ።

• ጸብጣይ ሐቅ መትዓውናይ ኦርድየት፡ መትዓዋን እግል ኣተግበሮት ወሐፊዝ ለተኣትሐዜ ምስዳር እግል ልንሰእ ለገብኦ ወራታት ብነ ዲብ ለዐል'ለ ኦርድየት ዓውናይት እግል ልብኔ ለልትሰመሕ እሉ ምንማቱ፡ ሐቅ መትዓዋን እትለ ለኣተግብር ዲቡ ወቅት እግል ጸብጣይ ኦርድየት መዓውናይት ለሐደ ኢመትወጣይ እብለ ለኣጀሬ ዲቡ ዐገል ሌጠ እብለ ሐቅ እሊ እግል ልትነፈዕ ቀድር።

• ዲብለ ቀድየት ሰልጠት ለሀሌት እለ ቤት ፍርድ እብ ኣሳሰ ጠለብ በዐል ሐቅ መትነፍቶት ኦርድየት መዓውናይት ሚዛን ወዐዳለት እት ሕሳብ እንዴ ኣቱት፡ ለመዓወንተ እንዴ ኢትበደል እግል ትትረፍ እግል ጸብጣይ ሐቅ መትነፍቶት ኦርድየት መዓውናይት እግል ተኣጅብር እቱ ለኢልትቀደር ቀደም ኣዜ ለኢትረኦ ጠባይዕ ኣው ቴለል ምን ልትከለቅ ኣው ለመዓወንተ ምን ትከለቅ እብ ሐዱ 20 ሰነት ለኣለፈት፡ ከለ መዓወንተ እንዴ ኢትቀየር እግል ትትረፍ ሀዩ ምስል ዓም መሰለሐት ለኢትናሱብ ዶል ትገብእ፡ እግል መዓወንተ እግል ተኣትኣይሰ ኣውመ እግል ትሸጠብ ትቀድር።

ፍንቱይ በያናት ዲብለ ኢልትሐረክ መምተልካት

ሐቅ ሐጹር ውበዕድ፡ ጸብጣይ ኦርድየት እግል ኦርድየቱ ክምለ እለ ሐዘ እግል ልሐጽራ፡ ገበይ ውሒዝ እግል ለኣርቴዕ እሉ ብነ እግል ልብኔ እተ፡ ዕጩይ እግል ልሸተል እተ ወምን ክዩድ እግል ልዓፌዕ እለ ቀድር። ምናተ እሊ ሐቅ እሊ ምስል ናይ ብዕዳም እብ ፍንቱይ ሀዩ ሐቅ ኣግዋር እብለ ተዐቅብ ገበይ፡ ቃኑን እብለ ለሀይቦቱ ሕዱድ መትነፍቶት፡ ክምስልሁመ እብ ሰብ መዝ (መስኡሊን እዳረት) ናይለ ደዋሒ እብለ ለኣፈጉሩ መምሬሕ ወቀዋኒን እብለ ኢልትጻረር ኣግቡይ እግል ልግበእ ቡ። እግል መሰል፡ ዎሮ ግዋረ እብ ኣቅሹን ወኣቅሩድ ዕጩይ ጎሩ ምን ልትወረር እት ቀበት ኦሮ ሸሀር እግል ልትባተክ ምኑ እት መሕከመት እግል ልሸኬ ቀድር።

ዲብ 7ጽ 10 ልተላሌ

መቃብላት ርኢሰ ኢሳይያስ አፈወርቂ

ምን ገጽ 2 ለተላለ.....

ለእት ውቅል ለህለው አስክ እለ እበ ናይ በዲር ማህያቶም ገይሶ ህለው። እቲ ጀግብ እግል ንትዐዲ ህዩ ለህለ ዓላብ እግል ነኣትጫርዩ ወጅብ። እተ ሐልፈት ሰነት ሌጠ። እብ ለትፈናተ አሰባብ ምን ዲሽ ፋግር ለዐለ ወኣዜ እት ዲሽ ለኣቅበለ የም አለቡ ኣዳም ሀለ። እሊ ዓላብ እሊ እብ መስኡልየቲ ልግበእ ወደረጀት ምህሮሁ እግል ልትጫሬ ቡ። ላመ ማል እግል ኩሉ ሰበት ፈግር። እሊ እብ ሞጅብ ዶል ልትጫሬ። እተ ካልኣይት መርሐለት እግል ንትዐዲ ቲ። እተ ብዕድ መኣሰሳት ሕኩመት። እዳራት። እት ሀይኣት ጀብሀት። እት መሓብር ለህላመ እብ ተሐት እንዲ አሰተብደ አስክለ ትወቀለ እግል ልዕረግ ቡ። ኩሉ ለዓላብ ክም ትጫሬ ወትጌመማ ቲ ህዩ እተ 'ተሌ መርሐለት ንትዐዲ ህሌን ለእንብል። መዋመጦር እሊ ናይ ኩልያት ድሑራም። ናይ ዲፕሎማ። ዲግሪ ወሽሃደትመ ብዝሓም ቶም። ክል ሰነት ዝያድ 10,000 ለገብእ ዐደድለ ምን ኩልያት ልትደሐሮ ወዲብ ሰጅል ማህየት ሕኩመት ለኣቲ ለህለው። እሊ መ ላዝም ምስለ ሰብ ማህየት እግል ልእቲ ሰበት ቡ። ነኣትዮም ህሌ። ለኣቲ ዲብ ሀለ ህዩ። ክም ዓዲ እንዲ ኢገብእ። ናይ ምህነት ተእሂል ወናይ ምህሮ ክልፍየቲ እበን እንዲ ደገፍካሁ። ምን 1,800 ነቅፈ ወለዐል ክም ሰበእ እግል ልግበእ ቡ። እሉም ምሮትክ እተ ህለዩ መጃል ክም ትክሰእ። ምህነት እት ወሰክ አክ'ለ ጌላቲ። እት 2000። 3000 ነቅፈ ወዝያደቲ እግል ልትወቀል እሉም ቡ። ሰብ ዲፕሎማ ወዲግሪመ መኣንበት ማህየቶም ነስኣ ህለው። አዜ እግል ዶሉ ድንጉር ምኒ ሀለ ለእንብል። ለዲብ ውዛራት ለሸቄ እብ ኣግደምየቲ ወተጃርብ ሸቅሉ እግል ልንስኣ ለወጅቡ ናስእ ኢህለ። ምናተ እተ ናይ ጌይት መርሐለት ሸቅል ሰበት ህለው ልትሸቄ ዲቡ ሀለ። ዮም ዓመት ተምም መኢፋሉ ምስል እንርእዩ። ላኪን ማህየት ኣክረተ ናይለ እሉ ሸቄክ ሸቅል ደፍዕየት ቲ። ሚ ክም አፍሬክ እብ ማሸን ቲ። እት መክተብ ቲ ወለ እት ብዕድ ወራት ወጠን። ማህየት ናይለ እሉ አፍሬክ ፍሬ ተዐበት ቲ። ምናተ ለከብደ ወለልኣትክኣድ ጋር ማህየት። እት ክል ሸቅል ለሸቄ ኣንፋር ሸቅሎም ወአፍረዮቶም ሐቲ ሰበት ኢኮን። እብ እስወ ክም ትላወዮ ድቁብ ሰበት ገብእ። ለመቃዩስ ክም አፍገርክ እሉ እግል ልትኣንበት ቀድር። ለሸቃላይ ናይ መበገስ ምዕያር እንዲ ወዲክ እሉ። “እንተ እብ ሸቅልክ። ምህነትክ። ኣግደምየትክ። ምህሮክ ወአፍረዮትክ። እትለ ደረጀት እለ ርቱብ ህሌክ ወደፍዕየትክ ኣክል እላተ” እግል ቲበሉ ብከ።

ለመኖሪት ለልሐባልክ ብዙሕ ጋራት ሀሉ፡ አሮት ምን መሸክል ህይ አብያት ሰከን ቱ። እት ናይ ነብረ ወብዕድ እስትህላካት እብ ናንቱይ እግል ሸቃለ ሕኩመት እግል ልግበእ ለቡ ጋራት ሀሉ። ለዐቤት ምሽክለት ላኪን ናይ አብያት ምሽክለት ቱ፡ ምን መደት ሕርየት አንበትናሁ፡ የምክን ናይ መሸሮዕ አብያት ኮርየ ትብኑ፡ እት ባጽዕመ እተ ክምሰልሁ፡ ወዲብ ብዕድ ድዋራትመ መሕገዝ



ሰከን እግል ነሐሄ እንዴ እንቤ ለአንበትናሁ መሻገሪያ፡ አክል አዩ ምነ ጠለባት አርሀ እንቤ ምን ገብእ፡ ሴመ ለልኦተግኔዕ ሐል ኢረኩብነ ምነ። ምሮ ነፈር ዮም ክም ሸቃላይ ሕኩመት እት እዳራት፡ ውዛራት፡ ጀብሀት፡ መሓብር፡ አምን ወፖሊሴ ዴሸ ውብድ መአሰሳት ሕኩመት ሸቄ ሀለ። አክረቱ ላኪን ለነብር እተ ቤት አለቡ። እሊ ህዩ እብ መርሐለት-መርሐለቱ እግል ንግልሐ-ብነ። ብዙሕ ላላት ቴክኖሎጂ፡ ማሸናት፡ ላላት ብሉኬቲ፡ ፕሪካስት ውብድ አምጸኦነ አሰክ እለ ላኪን ለትኦተግኔዕ ፍገራት ኢሀቤ'ነ። ሐለሌነ እንዴ እንቤመ ለነአዝም ምነ ጋር ኢኮን። አብያት እት መዳይን ሌጠ ኢኮን ለእንሸቅዩ፡ እት ብሩር ወሸብህ መዳይን ምስል ክዳማት ማይ፡ ከህረበት ወናይ ነዳፈት ወርስሐት መስቱራቱ እብ ኩሉ መቃዩሉ ብቐፅ አብያት ሰከን እግል ለሀሌ ቡ። ጅንሰ መንበረትክ ሜዛ፡ ጽሩይ ማይ ሲቶ ብኩ፡ ማይ ሕጽቤ ወነዳፈት ትረክብ ሀሌኩ፡ ናይ ምስትረሓት ክጡጥ ነዳፈት ብኩ፡ ከህረበት ክል ዶል ትረክብ፡ እት ድዋራትክ ናይ ምህሮ ወዳፍየት ክዳማት ብከ መ ኢፋልክ? አሰዋግ እግል ቲጊስ ምን ተሐዜ፡ አተቡሳት መዋሰሳት ወጽርግያታት ብከ መኢኮን፡ እሊ ኩሉ እንዴ ትጀመረ ጅንሰለ መንበረት ናይ መዋጥኒን ለአርኤ። ለማህየት ህዩ እሊታት አትመመቱ መኢፋለ እግል ትቀይም ብኩ።

ከራይ አብያት ቀለ እንዴ ትቤ መትሃጋይ ወእሉ እግል ትድሀር ከዲም ፋእደት አለቡ። መጦርለ ማህየት፣ መሻሬዕ አብያት እግል ለሐሰሴ ወሐል አብያት ሰከን እግል ልምጸእ ቡ። ምስሉመ ዐውል ነቅፊ እግል ልትደቀብ ቡ፣ ባኒ፣ ሰገ፣ሸከር፣ ዜድ ወከረ አጽብሐት ዐደሰ ከም ልትዘቤ ህለ? ቀሉት ሱግ ወአትዛባጠ እግል ንራቅቡ ብኑ። ምሮት ሐረስታይ ላሊ ወአምዕል እት ገርሀቱ ለአፍረዩ

እተይ እክል ልግበእ ፍሬታት፡ ሐምሌ ወብቁልያት፡ እደይ ብዙሕ እት ልትካበቱ እብ ዕሰረ ዕጹፍ እተ ገቢል ለመስኪን ልትዘቤ ሐቆ ሀለ እብ ከኣፎ መንበረት እግል ትሰኔ። መዝብያይመ ሰላዲ ሐላል እግል ልብለዕ ህሌት እሉ ድኢት፤ እብ ቀሎት እንግዮ ኡዳም እግል ልጨርብብ ኣለቡ። ምሮት ምን መታክል መንበረት ህዪ እሊ ቀሎት በዳይዕ ወኣትዛባጡ ቲ። እጃር ቤት ክም ምራድከ ተዓርጉ ወትከርዩ፡ ወኡዳም እት ከደን ፍገር ምን ቤቼ ትብሉ! እሊ ርበሽ እሊ ምሮት ምን ሕኩመት እግል ትራቅቡ ወሐቅ ናይ መዋጥኒን ፍንን መዝብየት ወመትካርየት ወለብዕድ መጅተመዕ እግል ትሳባ ወተኣድምኑ ለባ ተ። እተ ሱግ እብ ሐራም ወሐላል ሰላዲ መላ'ጦ ለህለው ሰብ ማል፡ ቀሎትለ ሱግ ምን ገብእ ወእጃር ኣብያት እየም ትትሰወግ ወለብዕድ ክፋል መጅተመዕ እት ኣከይ መናበረት ክም ልትካሬ ገብእ። ቀሎት እግል ትትህወን ህዪ፡ ኣጅህዘት ሕኩመት ወለከሰሶም መስኢሊን ልግብኣ ወኣንፋር ሕበር እግል ለጥሩቡ ቦም። እሊ ለወዴ ንዛም ሕኩመት እግል ንጠውር ብዜ። እሊ ናይ ሱግ ዕረጉትከረዮታት ህዪ ሐር ልጽንሕ እልን ለኢለኣተብል ጋር ሰበት ቲ። ሕኩመት መዋ-መጦርለ ወሰክ ማህየት እግል ተኣትሳንዩ ለበ ጋር ቲ።

እተ	እንድባጥ	ሸቅል
ወአፍረዮት	ለቤልካሁ	ሰኣል

ሆኑ፤ እኛ አፍሪካውያን ለእኩልነት እንድንችል ወደቀን እንግልን ንቀይሩ ለብን ጋራ-ት ብእቱ። መትጃሃር እንፈቱ፤ እሱፎሕ ውዕል እንዴት ወደቀን እንዴት አሳድሮብን፤ “ክም እሊ ሸቂክ ወክም እሊ ፈዕልኩ” ትብል። ሐቲ ምህንት እንዴት ደረሰኝህ ወአምር እንዴት ከሰብክ እብ ዋጅብ እንግል ትትነፈሳ እብ ብክ ወእብ ንዛም ወእንድባዋ እንግል ልትገየሰ ቡ። “ኢፋልዬ፤ አነ ሽሃደት ብዬ ወእሰክብ እውዕል ወማህየትዬ እነሰእ” ትቤ ምን ገብእ ላኪን፤ ለድራሰትክ ብላሽ ተ። ለአምርክ ሐቆ ሸቂክ እቡ ቱ ለዲብ ልደቀብ ወወሰክ ለገይሰ። እት ለትፈናተ ወራታት ሸቅል መሰለን አክል እሊ ትራሰካሻተር፤ አክል እሊ ዶዘር፤ አክል እሊ ገላባት ወማሸናት ዐባዩ ብክ እንብል። ለማሸን፤ ሸቅል ጀላብ እንግል ኢልብጠር ክል ምዕል ነኡትሳንዩ ወእትሓፈዝ ዲብ ሐቆመ ኢገብአት፤ ሐር ክምሰል ጀግሐት ወሸቅል ክም ተዐጠለ መትሳሰዓይ ኢነፊዕ። እንግል ተአሰንዩ ህዩ አላፍ ማል እንግል ትክሰር ዲባ ቱ። እምበልሁመ እት አሸቃል መካትብ ወሐንገል ትሸቁ ትገብእ። ለድራሰትክ እት ሸቅልክ እብ ከአፎ ትሸቁ እብ ህሌክ አክረቱ ለማዛንክ ዲቡ ቱ ለልትረኤ። እት ሸቅል ነሐር ለሸቁመ ንዛም ወእንድባዋ እንግል ለህሌ እሉም ቡ። እሊ እንድባጣት እሊ እት እዳረት ወአፍሪካውያን ለህሌት እሉ ሐዞት እብ ቀላል ለትትቀዩም ኢኮን። የምክን ለንትፋወሽ እቡ መቅደራት ብዙሕ ህለ እግልን እንግል ኒበል እንቀድር። ለልአሰፍ ጋር ላኪን እት ብዙሕ ድዋራት ዐድነ ልትለ’መድ ለጸንሐ ጠባዩዕ ናይ ኢመትሐሳር ወሀ’መሌ አፍሪካውያን ለልሀንእ መሐልክ ሰበት ቱ እንግል ልትሳፊ ቡ እብል። ወክሱሰን እት ሸባን። እት ክል ሸዋሬዕ ለአንገህቱ ለህለው ብዝሓም ሸባን አንትብህን እሉም ምን ገብእ። “ሚ ተአፈሩ ወትሸቁ ህሌኩም?” ምን ትብሉም። ሚ ወቤለው! ምን አየ እንዴት አምጸአው ቱ እት ሸዋሬዕ እት ልትፎጆጆ ልሄርር ለህለው። እንግል እማቶም ቀሽብ-ሕዮ እት ለአሩ ለዐቡ ለህለው አምኡት ወአላፍ አጀኒት እት ሚ ሓለት ክም ነብሮ ምሰሉ እንግል ተአትመጣውሩ ብክ። “እንግሉም ምሰሉ!” በህለ’ቼ እንዴት ኢገብእ፤ እንዴት ሸቂክ ሚ ተአፈራ ህሌክ? አክል ሕድ እግለ ርሕክ ኖሱ ሚ ትወዴ እለ ህሌክ? እግለ ብዕድ ሸቂክ ኢኮን ለእምለኩ፤ እንግል ርሕክ ወእግል ጸዋክ። ዮም እንዴት ሸቂክ ፋንጎሕ እንግል ትትናበር እቡ ለትቀድር ወለትአፈፊ እቡ ሚ አምር ወምህነት ጸብጥ ህሌክ? በዲር ለወረሰናሁ ወለአጸንሐናሁ ዓዳት ሸቅል ንዳል እንብል ከንትሃን። ህቱመ እንግል ኖሱ ድግም ቱ። አዜ ለህሌት ሓለት እ’ተ ረኤነ ምን ገብእ፤ ለሰልፋይ ርዝቅ ደውለት አደሚ ቱ። አደሚ

ህዬ ምክያሉ ወብዛሕሁ አምሩ ወምህነቱ፤ አምሩ እት ሳዐት ሚ ለአፈሬ ቡ ህዬ ምክያሉ ቱ። “አብካት ሸቅል ኢህለ” ወብዕድ መሰምሰ እግል ተሀርሰ አለብከ። ሕኩመት ኩሉ እንዴ ፈትፈተት እግል ተአውጅዱ እግልከ እንዴ ኢገብእ። እግል ኖስከ “አነ ሚ አፈሬ ህሌኮ” እግል ትሰአለ ብከ። ዐባዩ መሻሬዕ ወቴክሎጂ አምጸአነ እንዴ ኢትገብእ ለጋሪት፤ እተ ምጅተመዕ ለህለ ወአላፍ ሸባን ለህለው ዲቡ መጃል ዕጥል ወዩአፍረዮት እግል ልትሀወን ብዲቡ። እሊ ሰላዲ ሐዋለት እለ ለአሰተህልክ ልውዕል ለህለ እት ክል ገሃዊ እንርእዩ ሻብ ሚ ለአፈሬ ሀለ? እሊ ብላሽ ገይሰ ለህለ መቅደረት አዳም ቱ። እሊ ደሐን ንእዘም ምኑ። ለዲብ አሸቃል ክሱእ ለህለ አዳም ህዩ አፍረዮቱ ሚ ክም መሰል። እሊ አዜ ዋድያመ ለህሌነ ንዛም እት ሀይኣት ሕኩመት፤ እት ዴሹ፤ እት እዳራት፤ እት መሓብር እት መካትብ ጀብሀት፤ አፍረዮት ናይለ ነፈር ወህቱ ሸቂ እተ ለህለ መአሰሰት ሰኒ እግል ልትመዘን ብእቱ።

ሰአል፤ መዋመጦርላ ሕኩመት እት ሸግን ለወዳቱ እሰትሰማር፤ ምሰለ ብዝሐሆም ህዩ፤ ዲብለ ኣብዙት ሸቅል ሄራር ወሲዖሰት ሕኩመት ሚ ኣርደት ጡፍሕት እሎም ህሌት? እበ ጀህት ብዕደት ህዩ፤ ሒሊት ኣዳምን እግል ልጭመዋ ምኒን ለንብኣ ዋይዳግት ከኣፎ እግል ንጋብሁ እንቀድር?

ምን መደት ረደም ለአንተብህን እሌ፡ ላኪን እትለን ክልኤ ሰነት እት ፍዕል ትርጁማሙ ለህሌክ፡ አግደ ህይ እት ሽባን ለረከቤ፡ ክል ሰነት ዝያድ 15,000 ለገብኦ ሽባን፡ እት ኩልያት እግል ልኡተው እምትሓን ሽሃደት 2ይት ደረጀት ወዱ። ምን እሎም ኣሰኸ 20% ቱ እት ኩልያት እግል ዲግሪ ወዲፕሎማ ለልኡቱ። እሊ ለዲብ ኩልያት ለኢለኡቱ ዐደድ ላኪን ሑድ ኢኮን፡ 12 ኣልፍ ኣው 13 ኣልፍ ወእብ ሑዱ ህይ 10 ኣልፍ እት ክል ሰነት ገብእ። እሊ መሴሕ እግል ልትረፍ ሰበት ኣለበ፡ በሕ ብዝር እበ ትብል ሰቅራት እግል ንሸቕ እቱ ብክ። እሊ እግል ንዳዌ በርናምጅ ‘ማሞስ’ በህለት መርከዝ ተእሂል ምህናት ሳወ ከለቅክ። በርናምጅ መርከዝ ምህናት ሳወ ህይ እብ ሽሃደት እግል ለኣድርሱም ወለኣድሕርም ብእቱ። ለሸባን እብ ደረጀት ዲፕሎማ ወዲግሪ እግል ልትደሐር ምንመ ኢቀድሮ፡ ናይ ሽሃደት ኣብኮትመ እግል ልትከሰት እሎም ቡ። 12 ሰነት እት ምህሮ እንዴ ተዐበው እባሆም እግል ልትበለሾ ኣለቦም። እብ ለትፈናተ ኣሰባብ ንቅጠት እግል ለኣምጽኦ ሐቆመ ኢቀድረው፡ ድራሰቶም ለልኡተላሉ እበ ገበይ እግል ትርሔ እሎም ቡ።

ዲብ ገጽ 6 ልተላሌ.....



50 - አምዕል ቀደም እስትቅላል

ዲብሊ እብ መናሰበት 25ይት ሰነት እስትቅላል ኤረትሮፕ ለትኩተብ ለትፈናተ ቅሰስ ካቲመ ንዓል ለብእቱ ክታብ 'ካቲመ' "50 አምዕል ቀደም እስትቅላል" እብ ልብል ኦርጅን ሚኒኤል ጸጋይ ለክትብዩ ቅሰት ሳልሳይ ወናይ ደንጎበ ክፋለ እግል ንርኤ፡-

ክልኦት ዐባዩ ሰብ ውላድለ ደዋዬሕ ዘብጥ ክምሰል ሰምዐው ጠበሽ ቤለው። ጀራዲን እንዲ ወደው ለልትናበሮ ቶም። ሳሆ ወትግርኛ ለልትግገው። ጠቢዐት ናይለ ውሒዝ ህዩ ዝያደት ለለኦምሮቶም። ዲብሊ መኪነት ምን ዐለው እብ ልብል እንዲ ተአሰረው እግል ልብረኖ ለወጥኖመ ለዐለው። ለኢነት ምን አበች ዎሮ ክእነ ዲብ ልብል መክረ።

“እሊ ውሒዝ እሊ ደቅቡ ወዲቡ ለልትሓበር የም-አለቡ መሓዛት ሓልፋሙ ህሌኩም። እሊመ ምን ረወራት ዐዲቀይሕ ሌጠ ለትባገሰ

ጠወ ወምራየት ህዩ ሀጪምጪመት ገብኦት። እብ መንግስተኣብ ትትሰወግ ለዐለት ማርፔድስ 200 ኩንታል ሽንራይ ትገለ ምን። ዲብሊ መኪነትመ ደረር ዐቢ ጀረ። ናይ ዳዊት አሰፋቅ ማርፔድስ ዕልብ 1924 ውሒዝ ሰበት በለሰዩ ህተ ደረር ሳይፈየ። ጽዕንቱ ለዐለት 200 ኩንታል ሽንራይ ህዩ እብ ውሒዝ ትገለ።

መስኡል መዋሰላት ዐዲቀይሕ ረድ ናይለ ሰዋጌን ክምሰል ሰምዐ ለሳይፈት ብቅት እንዲ ተአከደ ምን እሊ ለተሌ ቀራር ሀበ።

“ምን ብቅት እግል ልትነጀው ለትቅደሮም ወደው። ለነስአወ



ሰበት ገብኦ ግረ ሐቲ ሳዐት እግል ልትሸበህ ቱ። ሰበት እሊ ረቢ ህለ ዲብሊ ውሒዝ እትሰረር። ውላጃ ዲብ ህሌኩም እተ ኣካን ኣሰብር።”

“ምክር ምን ዐቢተ!” ክምሰለ ልትባህል ክምሰለ ቤለዩ ሳዐት 5:00 ኣምሱይ ለውሒዝ እት ለሀድእ ገሰ። ለ14 ምናድሊን ህዩ ምን ማርፔድስ እንዲ ትከረው ዲብሊ ጠረፍለ ሕሊል ምሰለ ዐለት ጀግዐት ትዋጀሀው።

ሰዋግ ማርፔድስ ዕልብ 1924 ዳዊት አሰፋው። ውሒዝ ክምሰል መጽእዩ መኪነቱ እንዲ ኣብጠረ ባሩደቱ ወሽፈቱ እንዲ ጸብጠ ሌጠ ፈግረ። መኪነት ሳኪን እተ ዶለ እብ ድቁብ ውሒዝ እንዲ ሸክተት እብ ሰምጠ ኣግሐመት።

ሰዋግ ብቅት እንዲ ሳይፈቱ ክምሰልሁመ አው አርወሕ አውመ መምተለነት ዲብሊ ልትኣዜ እቱ። ሰኣላት ቀርብ እቱ ዐለ። ናይ እለን ዲብ መሓዝ ሐዳስ እብ ውሒዝ ለትባለሰዩ ወሽሕነቱን እብ ውሒዝ ለትገሊት ሐምስ መኪነት ሰዋጌን ህዩ ዲብ መስኡሊን መዋሰላት ዐዲቀይሕ ቀርበው። ለሀበው በሊስ ሕድ ለሽብህ ዐለ። ዲብ ሕሊል ሐዳስ ዑሩፋም እት እንቶም። እብ ጀሀት ዐዲቀይሕ ዐስተር ዲብ ጠብጥ ክምሰል ረአው። ለእግል ልትከፊ ለቀድር ውሒዝ እግል ልብደሮ ሳዐት 1:00 አደሐ አሰክ ቀሓይቶ ክምሰል ትባገሰው። ሳዐት 3:00 ክምሰል ገብኦ ምሽካፍ ለአለበ ኣካን ዲብ እት እንቶምቱ ለአጠረሚን ውሒዝ ክምሰል ተሃደፈዮም ለሸርሐው።

ቴድሮስ ምን ሰውግ ለዐለት ማርፔድስ 170 ኩንታል ሽንራይ ወክልኦት ጀንሬተር እብ ውሒዝ ክምሰል ትገለ ልትኣመር። መኪነት መቶረ ማይ እንዲ ኣተ እቱ። ኮፎኖ ትጨፍለቀ ወድማናይ ሶፕራ-ሰፖንደ

ምስዳር ምሰል ደቅብ ሕሊል-ሕዳስ ራትዐት ዐለት። ለሓለት ምሰዐል መቅደረቶምተ ለዐለት። ሰበት እሊ ለለኦሽኬ ልግበእ ወለለኦጃኬ ሴመ ኣለባም።”

መስኡል ናይለ መንጠቀት እግለ ቀራር እምበል መቃወመት ትክበተዩ። ሰበቡ። ለመስኡል ዲብ ብቅት ውሒዝ መኪነት አው መምተለነት እግል ለኣድሐኖ እት ልብሎ ለአስተሸህደው ብዝሓም አንፋር መዋሰላት ሰውረት ለኣምር ዐለ። ግረ እንዲ ኣቅበለ ህዩ ሰዋግ መኪነት ተሰፊኦለም ገብረትንሳኤ (ሳፔቶ) እንዲ ፈቅደ እት ዝክረት ናይ ሽሂድ ትሸመመ።

ቀብር ተሰፊኦለም (ሳፔቶ) ለረኦ ኢህለ። ክምሰል ልሙድ ዓደት ቀብር ሹህደኦ። ዝክረት ሹህደኦ እንዲ ወደው “ዐውቱ እግል ገቢል!” እንዲ ቤለው እግል ሽሂድ ለሳርሐ 3-4 ምናድሊንመ ምንገበኦ እት ቀብሩ ኢሸረከው። እስትሸሃዱ ለተኣከደ ዲብሊ ዲብ የም 8 ኣጎስት 1989 ዲብ ሀይኮተ ለሳይፈት ብቅት ውሒዝ። ምሰሉ ለዐለው መሻቂቱ እብ ሀበወ ሽሂደት ቱ።

አንፋር መዋሰላት እብ ፍንቱይ ህዩ ሰዋጌን መካይን እግል ተሰፊኦለም ሳፔቶ ደግሞ እሎም እት ህሌክ እብ ሰርቤብ ወሰፊላል ልዘኩ። ዲብ ዎሮ እግል ወሰቅት ታሪክ እንዲ ትባህለ ለዳለ ናይ ደግሞ ታሪክ እጅትመ። ዎሮ ዐቢ ምናድል እግል ሳፔቶ እት ፈቅድ ዲብ ምግብ እምበዕ እንዲ ሐሉቱ ህግያሁ ኣትካረመ። ብዝሓም ፍራስ መልሂቱ ለቀብረ ገዲም ምናድል እብ ዎሮ ሽሂድ መለሀዩ እንብዑ ከደን ዲብ ዛሬ ብዙሕ ወክድ ኢሳድፍ። የም ምን ትትነጃ ፈንገሕ ፈጅር ምሰል ትንፋሰክ ለኢትውዕል እተ ሰውረት። ዓዳት ሄዐ ወሽምበር ኢዐለ። ዓዳት እንቤዕ

ከርስ ወእስትንተን ሳኪን ዐለ። ምን ከደን ለኢትትካዬ እንቤዕ ወለዐል ለልትመክረህ ኣለብ።

ተሰፊኦለም ዲብ ሰነት 1956። ዲብ ቀሽት ባካት ኣስመረ ትወለደ። ኣቡሁ ቀሽ ገብረትንሳኤ ኣርኣዩ ምህንቱ እምብሬዝ ሰበት ዐለ። ዓይሉቱ ሰኔ ረፊዕ ለዐለ መንበረት ሰኔት ዐለት እሎም። እም ተሰፊኦለም ኣሰይደ ምልእቱ ክፍለማርያም ህዩ ሴድያይቶም ዐለት። “መሐምርገት እት ህለው ማይ ጭሩይ ኢልትሰቱ!” ክምሰለ ልትባህል ሳኪን ቀሽ ገብረትንሳኤ እብ ዐሳክር ኣቶብዩ ሰበት ትቀተሉ። ለዓይሉት መንበረተ ኣኬት።

ዲብ ደዕሮ-ቃውሎቡ ጸዕደ-ክርስትያን ወመድረስት ሕብረት ኣስመረ ኣሰክ ዓይ ፊልል ባጽሕ ለዐለ ተሰፊኦለም። ሐቆ ሞት ኣቡሁ። መድረስት እንዲ ኣትካረመ ክምሰል መሳዕድ (ኣይታንቲ)-ሽቅል ኣምበተ። ምን ሰነት 1975 እንዲ ኣንበተ ህዩ እብ ሰበት ንዓል ሽዑብ ኤረትርየ ለሐሰብ ሐቆለ ጸንሐ። ዲብ ዲሰምበር 1977 እት ሰውረት ፈግረ። ሐቆ ተድራብ ዲብ ወሬሕ ፌብራይር 1978 ዲብ መዋሰላት ትረተቡ። ዲብ ቅሰም በሐስ ወተዕሊም ናይ 4-5 አውራሕት ተእሂል እንዲ ነስኦ ህዩ። ዲብ ቅሰም መዋሰላት (ምውፋር) ክምሰል ሴድያይ ሰዋግ ትረተቡ። ረዩም እንዲ ኢጸንሕ ህዩ ሰዋግ እንዲ ገብኦ ለትፈናተ መካይን ሽሕነት እግል ልሰውግ ኣምበተ። መሰባሉ ወመቅደረቱ እንዲ ትረኦ ህዩ ቃእድ መጅመ-ዐት ሰዋጌን እንዲ ገብኦ ኣሰክ ኢነት እስትሸሃዱ ከድመ።

ሰነት 1989 ኮሚሰዮን መዋሰላት ግረ ከዋ ኣባይ። ዲብ ጋድሞታት ውበዕድ ኣካናት ዲብሊ ገብኦ ለዐለ ሐርብ እንዲ ትጽመደ ሓለፈዩ። 118 መኪነት ለኣሻረክ ሐርብ ሰራዩ። ዝያድ 70 መኪነት ለጠልበ ህጃም ሰሜናዊ ባሕሪ ወጋድሞታት ሽዕብ። ዝያድ 74 መኪነት ለጠልበ ሄራር ኣሰክ ኣሰሰ (ኣቶብዩ) ውበዕድ ዐስከርያይ ዐመልያት ህዩ ክምሰል መሰል ናይለ ሰነት ለህ ዐመልያት እግል ልትህደግ ለቀድርቱ። ለወክድ ለህይ ዲብሊ ሕሩር ኣራዲ ለዐለ ሽዑብ እብ ጀሐር ወሐርብ እዙይ እቱ ለዐለ አውካድ ቱ። ሰበት እሊቱ ህዩ ራድኢት እግል ኣብጸሐት ወቀይ ናይለ ኮሚሰዮን ሰበት ዐለ። ሰዋጌን እብ ነኣይሸ መታክል ለበዋሮ እቱ አውካድ ኢዐለ። ለቀም እንዲ ሐለፍኩ ወሒዝ እንዲ ተዐዳክ እብ ጸብኢት እንዲ ኢትርዕብ ኣተላላይ ሽቅል እግል ልትኣከድ ዐለ እሉ። ሰዋጌን ህዩ እሊ ሳድፎም ለዐለ መታክል ዐውል እት ደፈዶ እብ ስሙድ ወኢማን ሐልፈው።

ለትሰዓ ወተኣለምቤ ብርክ ተሰፊኦለም ሽቅለ እግል ተኣግዳ ናይ ደንጎበ ምሴት የም 8 ኣጎስት 1989 ዐለ። ዲብ መጅመ-ዐቱ ለዐለዩ መካይን ሸከር ወእክል እንዲ ጸዐዩ ምን ተሰነይ ኣሰክ ባርጉቱ ሄራር ኣስተብደዩ። ሕሊል ሀይኮተ ክምሰል በጽሐዩ ሳተ ውሒዝ ተሃደፈዩን። ተሰፊኦለም ወጅማዕቱ እብ ኣግሮም ዲብ ውሒዝ እንዲ ትከረው መካይን እግል ለሓልፍ ክምሰል ቀድር ኣከደው።

ተሰፊኦለም እግል ማርፔድስ ዕልብ 1780 እት ሰውግ። ለውሒዝ


እንዲ በትክ እግል ልትዐዳ እት ልብል እት ምግብለ ውሒዝ ሽክ ወደ። ዲብሊ መዐደዩ ለዐለ ጠረፍ እግል ሊኪድ ዲብ ልትሓነቅ ሳኪን። ሓርያም ከፈር መኪነት እት ወሐል ትረወክ እቡ። መኪነት ህዩ እግል ሕርዶ ቃራተ ለተኣሰረት ወኣት እት መሰል ምን ኣካነ ኩስኩስ እግል ቲበል ኢቀድረት። እብ ጀሀት ምፍጋር ጸሓይ ሀይኮተ እት ረዩም ኣካናት ዐስተር ልሰዕ ትበርቅ ዐለት። ለልሰዕ ዲብ ውሒዝ ለይኣተው መልሂቱ ውሒዝ ሼብያይት እግል ኢለዐርየም ዲብ ልሳሰዐው እብ ክልኤ ዲብ ይቡስ ምድር ለዐለዩ ማርፔድሳት እግል መኪነት ተሰፊኦለም እብ ካዎ እንዲ ሰሐበው እግል ለኣፍጉረ ትጸገመው። ሳኪን ኢቀድረው። ሳልሳይት መኪነት እንዲ ወሰከው እግል ልሰሐቦ እት ልዳለው እቱ ለዐለው ወክድ ህዩ ልትፈረህ ለዐለ ጋሻይ ወሒዝ እግል መሓዝ ረግሐዩ። ለወክድ ለህይ ለሰዋጌን ኣርወሐቶም እግል ለኣንግፎ ዲብ ጠረፍለ ሕሊል ትሸኸው።

ተሰፊኦለም መኪነቱ እተ ሕሊል ተርፈት ለእንዲ ጸብጠ እግል ለኣፍግሩ ለቀድር ክምሰል ባሩደቱ ወክፋፋ ምሰለ መኪነት እብ ውሒዝ እግል ልትገሌ ነፍሱ ኢውዴት እሉ። ባሩደቱ እግል ለኣፍግር ከእግል መሳዕዱ ገብረሀዋርያት ተክሌ (ወዲ-ሉቱ) እግል ለኣትኩበት ዲብ መኪነቱ ኣተ። ምናተ ውሒዝ ደቀብ ወምሰዐል ኮፎኖ እግል ልሕለፍ ኣምበተ። ዲብ ደንጎበ ተሰፊኦለም እንዲ ሰረ ዲብሊ ውሒዝ እት ለኣቱ ክምሰል ትረኦ ግራሁ ሳኪን ትሸረቡ። ሳሊ ሰበት ዐለ ገብረሀዋርያት (ወዲ-ሉቱ) ሳምፓዲነ እንዲ ኣብረህ እብ ኣዋራፍለ ሕሊል እት ልሸወር እግል ልታብዑ ጀረቡ። ሳኪን ሴመ ኢአውቀ።

ፈጅራተ ኣንፋር ሀንደሰት ወሰዋጌን ዲብ ኣዋራፍለ ሕሊል ኣሰክ ገበይ 4 ሳዐት እንዲ ሄረረው ምንመ ኣትኣሰረው ተሰፊኦለም ኢትረከቡ።

ወሳይቅ ንዓል ወመልሂቱ ክምሰለ ለሐብሮ ተሰፊኦለም እብ ኣደብ ሃድእ ወዕሸረት። መልሂቱ ለሐሐሽም። ከብቱ ኣዳም ለቡ። ለደርስ ወሰኣደርስ ዲብ እዳረት ሽቅል ብሹል። ዲብ ሽቅሉ ሰቡል ወባትክ እብ ቃትን ወኣደብ መሰል ሰኔት እግል መልሂቱ ቱ ለዐለ።

ተሰፊኦለም ዲብ ሰንት 1988 እግል ምናድላት ምልእቱ ሀብቱ (ነፈር ምውፋር) እንዲ ሀደ ሐቱ ወለት ታርፌ ሐድጎ። ምናድላት ምልእቱ እብ ዎሮ ክምሰል ውላደ ወእብ ካልእ ህዩ ክምሰል እማነት መለሀዩ ወበዐል ቤተ እት ትራዒ ለጻቤተ ሩተ ተሰፊኦለም። የም ሩተ በዐል ጼወ ወእም ክልኦት ውላድ ህሌት።



ተሰፊኦለም ወልደንጉስ መኪነት ዲብ ሕሊል ሐዳስ እት ወሐል ሐቆለ ኣቱት ሐቆ ሰለስ ኣምዕልቱ ኣሰክ ዐዲቀይሕ ለፈግረ። እብ ሓለት ሳኪን ሰኔ ግሂ ወሕዩር ዐለ። ዲብ መኪነቱ ወሽሕነቱ ለጀረ ደረር ምን ናይ ብዕዳም ለልትፈንቱ ይዐለ። ለእብ ውሒዝ ከርብ 200 ኩንታል ሽንራይ። እንዲ ኣንሸፈው እግል ልትነፈዶ እብ እግል ሰካንለ ድዋራት ተሀየቡ። መኪነቱ መቶረ ማይ እንዲ ኣተ እቱ ኮፎኖ ትጨፍለቀ ምራየት ወዐባዩ ኣንዋር ክሉ ትሳበረ። እሊ ሳኪን ምሰል ደቅብ ናይለ ውሒዝ እት ልትመጣወር። “ኣሰናይ እብሊ ሐልፈ እግል!” ለለኣብል ዐለ።

ለኣግደ ለኣግሀዩ ሳኪን። ለዲብ ጋቢነት ምሰሉ ለዐለት ምናድላት እብ ውሒዝ ኣስተሸህደታቱ። ዲብ መሸንገል መኪነቱ ለዐለው ምናድሊን ለወለት እብ ውሒዝ ዲብ ትትገሌ ርእያመ ዐለው። ተሰፋይ ወሀተ። እንዲ ትሻፈገው እት ወክድ ሰኔቱ ዕዳያም ለዐለው። ተሰፋይ ለምን ሐርብ ዓለበርዕድ (1978) ለመሰከን እግሩ ሕንክልሽ ሰበት ልብልቱ - ጠፊዕ ለትብል ክናየት ለለዋኦት እቱ። ህቱ ለጠረፍ ዶል ኬደ እብ ኣርበዕ ቃረቱ በዋረ። ህተ ሳኪን ጠረፍ በጽሐኮ እት ትብል ወሰእየት መንገፎ እት ብእቱ። ዲብ ሕሊል እት እንተ ዲብ ውሒዝ ወድቀት ወእብ ውሒዝ ትገሊት።

ሳዐት 5:00 ኣምሱይ ወሒዝ ክምሰል ሀድኦ ምን መኪነት ለትከረው ምናድሊን እተ ዶሎም እግል ኣረይ ውሒዝ ለገብኣት መልሀዩቶም እግል ልሕዘው ገጸም ተሐት ትፈረረው። ሳመ ውሒዝ ትንፋሳ ዲኢትን ገርብ እግል ልንሰእ ለይሐዘ እት መሰል ምን 200 ምትር እተ ኢትረይም ኣካን ለክፈየ። ለሐዝዩትመ ብዙሕ እንዲ ኢልትዕቦ ግናዘተ ዲብ ባካት ረክበው። ሕፍረት እንዲ ሐፍረው ሐቆለ ቀብረወ ዝክር ሹህደኦ እንዲ ወደው ትሳረሐው ምን። ሐቆ እሊ ኣሰክ ዐዲቀይሕ እብ እግሮም ሄረረው።

ተሰፋይ እግል ምሰሉ ሳፍሮ ለዐለው እንዲ ትሰኣለ ክምሰለ ኣመረዩ። ለብርክቱ ትትብህል ሽሂደት። ነፈር ክፈል-ጃሽ 16 ተ ለዐለት። ብዋረተ ምግባይት። ገናበተ ሐመልማል። ዕንድቅቱ ለዐለት ዕንዳቂ ኮለይ በዐል ጀላል ምሔርባይት ተ ለዐለት። ተሰፋይ። ለእብ ብቅት ውሒዝ ለትገሊት ምናድላት ዲብ ትትካየል እሉ ለትፈንቱቱ ፋርስት ዲብ ትትረኣዩ ክምሰለ ብዕዳም ሰዋጌን ዲብሊ ልሰዕ ልታክዩ ለዐለ ወቀይ ካቲመ ሐርብ ትፈረረ። ዲብሊ ወክድ ለህይ ሰእዮብ እስትቅላል ምንመ ዐለ። ሐቆ 50 ኣምዕል ጃሽ ሽዕቢ ኣስመረ እግል ልእቱቱ እንዲ ቤለ ለሐሰበ ኢዐለ። ክምሰልሁ ሳኪን ገብኦ።


መቃበለት ርኢስ ኢሳይያስ አፈወርቂ

ምን ገጽ 4 ለተላለ.....

እብሊ በርናምጅ “ማሞስ” ተአንቦተ፡ ምናተ ለልኦትሐዜ ሀደፉ ኢዘብጠ። ‘ማሞስ’ ብዝሓም ሽባን ምንመ ኦድሐረ፡ ለምሽክለት ሰረ ሌጠ እግል ልባሌሕ ቀድረ። ናይ ሰነት ምህነት እንዴ አድረስክ እት ሽቅል ለከሰአካሁ ኦዳም፡ መሴሕ ለተርፍ ሻብ እት በሕ ከፊክ በሀለት ኢኮን። ለዐደዶም ብዙሕ ምንማ ቱ፡ ለጅንሰለ ምህናት ለእሉ ነሰአመ እግል ሊዚድ ወልሰኔ ብእቱ። ምን ልውሕድ እት ደረጀት ዲፕሎመ እግል ልትወቀል ቡ። ክል ሰነት 10 አልፍ እብ ሽሃደት ትደሐረው ሕኔት እንብል፡ እብ ዲፕሎማ 10 አልፍ ኦድሐርን እግል ኒበል ብኸ። እሎም ሽባን ሰኒ እግል ልድረሶ ሐቀመ ገብአ ድሩሰ ምህነት እግል ልውሰዕ ቡ፡ መዓምል ወወርሻት ሽቅል እግል ልብዘሕ ቡ፡ ኦቅሳም ኮምፕዩተር፡ምደርሲን ድቁባም ወንዛም እግል ለሀሉ ቦም። እብ ፍዕል ምህናት ለከሰቦ እቱ መጃል እግል ለሀሌ፡ እት አሽቃል ብነእ፡ እት ምህናት ሐርሱ፡ እት ናይ ሐጺን ቴክኖሎጂ ወናይ ከህረበት ሰኒ እንዴ ደርሰው፡ ጠለባት ወጠን ለልኦተሞ ለነፍያ ወለልትነፍያ እግል ልግብአ ቦም። አሰክ እት ናይ መካትብ አሸቃልመ ለትፈናተ ምህናት እግል ተአድርሰ ሰበት ብኸ፡ እተ ሐሰት ደረጀት እግል ልትወቀል ቡ። እሊ ናይ ‘ማሞስ’ መጃላት እንዴ ጠወርኸ፡ ምን ዲፕሎሙ፡ ዲብ ዲግሪ ደረጃት ለኢትዐዴ እቡ ሰበብመ ኢሀሉ፡ እት ክል ኦካን ህዩ ለአሽቃል ጸብጣሙ ህለው እት ማሸናት ልግበእ ውበነእ። ምናተ እብ ምህነት ወድራሰት ዝያደት እግል ልትጠወሮ ብእቶም። እሎም ለተአድርሰ እቡ ህዩ ሞወር ኦላት፡ መዓምል፡ ኮምፕዩተራት፡ ውረሽ ወዝያድ ኩሉ ህዩ ምደርሲን ፈዳብያም ለኦትሐዘኩ። እሊ ክም ኦትመምኩ፡ በሕ ብዝር በጽሐናሁ እግል ኒበል እንቀድር፡ እት ገበዩ ህዩ ህሌን ወፍገሪት ሰኔት ትትረኡ ምኑ ህሌት።

ሽባን ምን እለ ደውለት እግል ልፍገሮ ለገብእ ዋይዲባት ህዩ፡ እወጅ ሐርብ ቱ እግል ኒበሉ እንቀድር። ሰበቡ ህዩ፡ እልነ እግል ለኦተጅግሐ እተ ሐልፈዩ 25 ሰነት ለኢጀረበወ ተልገ ኢህሌት። ለአግደ ሀደፍ ህዩ፡ መቅደረት ኦዳምን እግል ፈንጠሮት ቱ። ለዐለነዉ ሐርብ እብ ከአፎ፡ ወሚ ስታት አፍገረው እሉ፡ እንዴ እንቢመ እግል ንትሃጌ እንቀድር። እትሊ ድዋራት ለተበወሰ ሰያሰት ወፈሸለ እት ንዘዕ ወጅግራ ተ ለኦቲት። “ኤረትርየ መቅደረት ኦዳመ እግል ትትጨመም ምና ብ” ኦባማ ለአውጁ ውበዕድ፡ እሊ ሸቀላት እሊ አክረቱ ሚ ቱ ሀደፉ ምን እንብል፡ የም አለቡ አሸዩኦ ሀለ ለኢነአንተብህ እቱ፡ ኦክረቱ ላኪን፡ እግል ኦድዐፎትን

መኔዕ ለወደው እትነ ሰለሕ እግል ኢንትዛቤ፡ መቅደረት ዐስከርየትን እግል ኢነአደቅብ፡ ምድርን እግል ኢነሐርር ሌጠ ኢኮን። እት ዳይም ደግሽ ሕዱድ እግል ኦተዮትን ለወደዉ ብላሽ ኢኮን፡ ቅወትን እግል ሐምረጎት ለኢትጀረብ አሸዩኦ ኢሀሉ። እት ካርጅ ጀነት ክምሰለ ህሌት፡ ምን እንሰር አቶብየ ትትዐዴ፡ ከእብ ገበይ ወያኔ ለትዳለ ታላት እቡ፡ ሕዱድ ሱዳን ተኦቲ፡ ምኑ ሕዱድ ሊብየ ትገይሱ፡ ምኑመ ላምፔዱሳ ትገይሱ፡ ምን ሰልዋ እልክ ኢጣልየ ተኦቲ፡ ክምኑመ ሰዊድን ውበዕድታት ምን ሰልዋ እክ ህዩ አሚሪክ እት ትብል ትገይሱ። እግል ሚ ቱ ክምሰልሁ ገብእ ለሀለ? ምን ትብል፡ አርእስ



ገናድ ቱ። ደዓም 2016 እትሓድ አርብ እግል ሕኩመት ወያኔ፡ 500 ሚልዮን ዩሮ ቀረረ እለ። እግለ እት ኤረትርየ ለህሌት ቅወት ሽባብ አብነት ሽቅል እግል ትፍተሕ (Job Creation) ሕኩመት ወያኔ እት አቶብየ እግል ትክለቀ እሎም። እትሓድ አርብ ሰኔት ለሐሰብ ምን ለዐሌ፡ እግል ሚ ቱ እት ኤረትርየ ሽቅል ለሐግለው እግሎም እብ ገበይ አቶብየ 500 ሚልዮን ዩሮ ማጢ ለዐለ? እሊ እምበል ቅወትን እግል ልፈንጥር፡ ብዕድ ለገብአ ሀደፍ አለቡ። ሽቅል እግል ሽባን ኤረትርየ ሐቀመ ሐዘው አፎ ዲብ ኤረትርየ ኢክለቁ እሎም? እት ሕዱድ ሱዳን ለሀለ መከበት ኤረትርየን ሽባን፡ እግሉመ 170 ሚልዮን ዩሮ እንዴ ተሀየቡ፡ መአሰሳት ዩ.ኤን ደካኪንን ካሰታት እሎም ህለዩ፡ እብሊታት እግል ለአጅግሓነ ላኪን ቦታተን ኢልሕሰቡ። “ኤረትርየ እግል ተአጅጌሕ ላኪን፡ እሰልፍ ሸዐበ ፈናጥር ምነ ለርዝቀ እግል ትጭመም” ቱ መሰሎም ለሀሉ። እት አርብ ወአሚሪክ እብ ዓመት እት ድወል ምውዳቅ ጸሓይ ለሀለ አዝማት እቅትሳድ ወመሻክል እብሊ ናይነ ቅወት በሸር ወልጃእ እግል ለኦትሐሰሱ ለሀደፉ እግል ልግበእ

ቀድር። እትሊ መንጠቀት ወእብ ፍንቱይ እት ኤረትርየ ለረከዘ ሀሞም ህዩ፡ እትሊ 25 ሰነት የም ለአለቡ አክትብት ወአፍላም ለኦተፍግር። ምን እትሳል ሞባይል እት ዓይላት እንዴ አንበትክ እማት ክም ደንግጸ ወአጅኒት ምኑ ክም ፈግሮ ወምኑ ወኬንመ አሰክ እት በሐር ተርቅ ከከበርክ መጽእ እግል ሊደየ ከዲም! እሊ ስቲት ዋይዲባት ቱ - ብላሽ ኢኮን። ንዝማት ዐባዩ ናይ ሰለለ መአሰሳት አሚሪክ ወአርብ ለህለየ ዲቡ ወማል ብዙሕ እንዴ ሸልዐየ እሉ ሸቅየ ዲቡ ለህለየ ቱ። እብ ከአፎ እንጋብሁ ብዕድ አርእስ ምንማ ቱ፡ እብሊታት እለ ደውለት እግል ለአጅጌሕ ለልሐሰብ ኢትትዐብ እክ ሌጠ እብሉ ኦነ።

እንዴ ቀብብናሁመ ኢንትአየሰ ዲቡ ለበሀለት ኢኮን፡ እብ ኦላፍ ለልትዐለቦ አጅኒት እት አርብ ወአሚሪክ እንዴ ትዘበው መዓብያይ ሓግላም ህለው፡ ምክራዮም ትቀዌት ለልትበሉመ ህለው፡ እት ክእነ ለካሬ ሕቁቅ ኦደሚ ህዩ ሀለ ገብእ? ድወል እንዴ ፈናጠርክ ወእት ሕድ እንዴ ቀርሐኩ፡ አርዛቀን እንዴ ጨመምክ ምነን፡ ረሕመት ለአለበ ጀሪመት እግል ቲዴ እተን ፡ ፈሸል ሌጣ ቱ እብሉ ኦነ። እሊታት ምን ጋብሆቱ እግል ንትሐለል ኢኮን፡ ይእንቀብቡ ወሸቅል ቤትን ምን ሸቂ ህዩ እግል ንትገሴ ኢኮን። ኦክረቱ ላኪን፡ እትሊ ለሐልፈ 25 ሰነት እልነ እግል ለአጅግሐ ለኢጀረበወ ከይነት ኢህሌት። ርኢስ ፈረንሳ፡ “ኤረትርየ ሐቀ መደት ሐጫር ሸዐበ እግል ልግዐዝ ምና ቱ” ለቤሉ ህዩ፡ ከአፎ ኦመርካሁ ኩሉ ኦዳምን እግል ልትሸለት ምኒ ክም ቱ? ምን ቤሌካ ቱ፡ ኤረትርየ ህዩ ማጽእ ከርኢህ ተአምር አው ኦዳምክ ናድእ እትነ እንተ? ምን ትብሉ፡ እለ ናይ ጀርመን እሲት ማርክል ለልቡለ እት ኦዲስ አበበ ለሸቁቱ ሽቅል ህድግ አለቡ፡ እት ሱዳን ወመሰርመ እትለ ክምሰልሁ፡ ሚ ከሲኩም ከአክል እሊ እብነ ትትሻቀሉ ወአፎ ሽቅልኩም ኢትሸቁ?” ምን እንብሎም ሚ

ወበልሰው ገብእ! እሊ ኦነ ናይ ሐንገሎም ሸለል ሌጣ ቱ እብል፡ እለ ደውለትን ኢለአመረ ወልሰዕ እንዴ ኢለአመረ ወክዶም እንዴ ተመ እግል ልብለው ቱ። እሊ ህዩ ኦነ መሸርዐን ቱ ለእብሉ፡ አሰክ ክእነ ኤታናት እንዴ አፍገርክ እግል ሐቲ ደውለት ንኢሽ እግል ትፈንጥር ወኦዳመ እግል ተአግዕዝ ዐሎባዋ ላቱ፡ ወሰፍ ደሐንመ ኢትብሉ፡ ላኪን ለልአሰፈን ወለሐሐልነ ሰበት ኢኮን፡ እግል ንትባጠሩ ክም ቱ ሸክ ኦለብዩ።

ሰኣል፡ ምስለ ቀሎት እጃር አብያት ለአኩብደ ለሀለ መናበረት፡ እትሊ ሰነት 2017 ርኡይ ሐል ለልአመጽእ በራምጅ ምን ሀሌ ለቀደየት ምስለ ደቅቤ እተ መጽእ

አውካድ ልግበእ ወዮም ዓመት ሕሰብ ለሀለ በራምጅ ዝያደት ተውዴሕ ምን ተሀይበኸ? እብ አማን ቀሎት ናይ እጃር አብያት እት አንፋር ልግበእ ወመናበረት ከልቁ ለሀለ ጸር ቀለል ኢኮን። ግረ እንዴ አቅበልኩ፡ ምን መደት ሕርየት አሰክ አዜ እሊ ወእሊ ሸቂን እግል ኢበል እንዴ ኢገብእ፡ ክምለ እት ከረ ሰምበል እብ ሞወር አግቡይ ሸቁይ ለሀለ ኩለ ምስትረሓት፡ ክጠጥ ማይ፡ ጽርግያታት ለቡ ወታምም ሕፍዝ ለገብአ እሉ፡ ምርት ክምለ ልትሐዜ ለትሸቀ መሸሮ ቱ እግል ኒበል እንቀድር። እት ባጽዕመ ክምሰልሁ ትጀረቡ እብ ክምሰልሁ ሄራር ሻፍግ ለናይ ሽቅል መቅደረትን እት እንወቅል፡ ለልኦትሐዜ ዐፍሽ ክም ናይ እስመንቲ፡ ሲክ (ተንዲኖ) ውበዕድ ኦላት ብነእ እንዴ ኦታመምኩ፡ ቅድረትን እግል ነግቤ እንዴ ትበሀለ ለገብአ ጀርቤታት ክም ናይ ሸሪክት ሙሰ-ዐሊ እት ድዋራት ባጽዕ ለትጀረቡ እት ማይ-ሐጸ ለትጀረብ ሀሉ፡ ምናተ ለመሻሬዕ አሰክ እለ ታምም ኢሀሉ። እት ለሐሰ ቴክኖሎጂ እንዴ ተዐዲነ እግል ንጀርብመ ናይ ፕሪካስት በርናምጅ ተኦታተ። እሊ እት ለትፈናተ ድዋራት አሰመረ ሰር እት እንቲ ባጥር ለሀለ መሻሬዕ ብንዩት

ኦብያት ቱ። ለኩብደ መሻክል ኦብያት እት አሰመረ ልትረኡ፡ እተ ብዕድ መዳይንመ ምን ገብእ ተአሲር ቡ። እትሊ መሻሬዕ እሊ ለሸቅየ ሸሪካትን፡ ለዲብ ብዕድ ድዋራት ጸብጣቱ ለዐለየ መሻሬዕ ምኑ እንዴ አዝመየ፡ አርብዕ ሸሪክት ምን ሐዲስ እንዴ ትነዝመየ ኦትያት ህለዩ። እለን አርብዕ ሸሪክት እለን ለመሕገዝ እግል ለአርህዩ፡ ለናይ ማይ-ሐጸ 400 ውሕደት ኦብያት ለብእቱ እንዴ ኦትመመየ፡ ዲብ ብዕድ ናይ ፕሪካስት ዕዱያት ህለዩ። ደዓም ክምለ ልትሐዜ ሰኒ ኢሄረረየ ዲቡ፡ መታክል ብዙሕ ሰበት ሳደፈየን ዲቡ፡ ለሸቅል ኢሰልጠ። ምን የናይር 2017 እንዴ አሰተብደየ እግል ለኦትሻፍጋሁ በርናምጅ ፈግረ እሉ ወሸቅየ ዲቡ ህለዩ። ከአፎ ገይሰ ክም ሀለ ሲናዶ እት ገብእ እሉ ልትሸቁ ሀሉ። ምነ መሕገዝ አክል ሚ እግል ለአቅልል ቀድር ምን እንብል፡ ሰኒ ሕድት መርህዮ ለልአመጽእ ሌጣቱ። ለዐቤት ምሽክለት አሰመረ ወድዋራተ ናይ ብንዩት ትሕትዩት ምሽክለት ቱ። ናይ ምስትረሓት ክጠጥ፡ ናይ ማይ ርሶሕ ልግበእ ወወሓይዝ ዝላም ለልሄርር እቡ በላዓት ክምለ ለኦትሐዜ ኢትጠወረ፡ እብ ጨቅዋ እት ረኣሰለ ናይ በዲር ገብእ ለሀላ ቱ። ለናይ ማይ ክጠጥመ ምን ገብእ፡ እበ ናይ በዲር ቱ ሸቁ ለሀሉ፡ ዐነድሩ እንዴ ሰገረ ወትዳብኦ፡ ሰኒ ለሸቁ ዐነድር ኢሀሉ። ናይ ከህረበት ክጠጥመ ምስለ ሐዲስ ጠለባት እግል ልእቱ ዲቡ፡ ክል መሸሮዕ ኦብያት ናይ ብንዩት ትሕትዩት እግል ትዳሌ እሉ ሰበት ቡ፡ እምበለ እት አጥራፍ አሰመረ ሉጡእ ለሀለ ክዳማት ለአለቡ ሰከን-ቀወሽ፡ ምን ጅወት አሰመረ እተ ምን 8-10 ኪሎ ምትር ለራይም ድዋራት ምድር ብራቁ እንዴ ትነከሐ ለፈግረ እሉ ኤታን ሀሉ። ክም ውጫል (ሳተላይት) መዳይን ናይ አሰመረ እንዴ ገብአየ እግል ልትጠወረ ለበን አማካን፡ እሰልፍ ለተኸጢዋ እንዴ ትዳሌ፡ ናይ ሸዋሬዕ፡ ሸበክት ዐነድር ማይ ርሰሐት፡ ክጠጥ ማይ፡ ናይ ከህረበት ውበዕድ ክዳማት ለቡ፡ እንዴ ትከጠጠ ለትጸበጠ ሀሉ። እሊ ላኪን ንዩት ሌጠ እግል ኒበሉ እንቀድር። እግል ንሸቀዩ ለህሌት እግልነ መቅደረት ሚ ትመሰል፡ አክል አዩ ኦብያት እግል ንሸቁ እንቀድር? ምነ እተ ሐልፈየ ሰለሰ ሰነት ለትረኦ መታክል፡ ምርት “ኦነ ኖሼ ቤት እግል እሸቁ ቱ” ልብል። እብ ኖሰክ ቤት እግል ትሸቁ ሐዜክ ምን ገብእ፡ እስመንቲ ወሐጺን ሲክ ምን አየ ተአመጽእ ሰበት ኢትአምር፡ እት ዝቤ-ሕሶዕ (Speculation) ተኦቲ። ለሸበክት ክጠጥ ማይ፡ ለጽርግዩ፡ ለከዋ ከህረበት ውበዕድ ብንዩት ትሕትዩት እበ እግል ቲጊስ ክም ወጅብ ኢትሐሰብ እለ። ሰበት እሊ ለሸቅል እት ለኢትጠወረ ናይ ቀወሽ ሸይ ትቀየረ።

ዲብ ትመጽእ ሞብዕት ልተላሌ



አቅሊም ጋሽ በርከ እም ክሉ ዝሕረታት ቱ እግል ኒበል እንቀድር። እብ ዝሕረት አዳም ርኤነ ምንጉብእ እት ክለ ለዐድነ ለህለዩ 9 ቀምያት ዐድነ ለልሐቅፍ ወዝሕረት ጠቢዐት ለመልክ አቅሊም።

እሊ አቅሊም እሊ መዓድን፡ ምድር፡ቃባት፡ሐዋናት ዐድ ወከደን፡ ምድር ሐርስ ወጽድቅት ትርበት ክምስልሁማ ዝሕረት ማይ ብዝሕት ለመልክ አቅሊም፡ እብ ምግብ ለልሐቅፍ ውሓይዝ ወሐላይል ዒን ማይ እሊ አቅሊም።

ዮም እሊ አቅሊም እሊ እት ከብዱ ለህለ ዝሕረታት እብ ሽቅል ልታዩን ሰበት ህለ እግል ክሉ ባርህ ጋብእ ህለ፡ እት ከብዱ ለህለ ሐዋናት ዐድ ወከደን፡እት ሐን-ምድሩ ለህለ ዝሕረታት መዓድን፡ እግል ሐርስ ዱሉል ላቱ ጽዱቅ ጋድሞታቱ፡ እብ ከብዱ ለዘፊ ውሓይዝ ለከርዕ ዲጋታቱ ውበዕድ እት ታዩኖቱ ምስዳር ዐባይ ሰበት ትበጽሐት፡ ምን እሊ አቅሊም እሊ እት መጃል እክል፡ሓሊብሰገ ፈርያት ጀራዲን ውበዕድ ሰላዲ ካርጅ ለልኦመጽእ መዓድን ገሌ ምን ልስሕቡ።

ዮም ላኪን እት ዎሮት ምን እሊ ዝሕረታት እሊ እንዴ ተንክብክ እግል ንህደግ ቱ፡ ህቱ ህዩ ምን እት ከብዱ ለህለ ርዝቅ ሐዋናት ከደኑ እት ገብእ፡ እቱ ሌጠ እብ ብዝሐ ለልትረከብ ሐርማዙ እብ እግል ንህደግ።

እብ ደረጀት አፍሪቀ ሓለት ሐርማዝ እንዴ ርኤነ እትሊ አርእስ እሊ አቅብሎት ምህም ሰበት ገብእ አሰልፍ አስኩ እግል ንደርር።

ብዝሐል እት አፍሪቀ ለህለው ሐረምዝ እትሊ ወክድ እሊ 500 አልፍ ሐርማዝ ሌጠ እቱ ድሀር ህለ፡እሊ ምስለ እት ሰብዒናት ለዐለ ዕልብ ልትርኤ እት ህለ ምድር ወሰማቱ፡ እት ወክድ ለህይ ለዐለ ሐረምዝ አፍሪቀ 1.2 መልዮን በጽሕ ዐለ።

ለአግደ አሰባብ እሊ ህዩ ንዕዩት ሐረምዝ እብ ወለት ገበዴ፡ቅታል ሐረምዝ እብ ሐረስቶት፡ሐርብ፡ ጀሐር፡ኣውጡይ አካናት ሐረምዝ ውበዕድ ከምክም።

እት ዐድናመ ኤረትርዩ እንዴ አቅብልኑ ሐረምዝ እግል ልብደው እብ ለቀድረው አሰባብ ምን እሊ ለእንቤሉ ምንመ ኢልትፈንቱ፡ ለአግደ በዳሁ ጋብእ ለህለ ጋር ላኪን ፍንጌ ሐረስታይ ጀራዲን ወሐረምዝ ለህለ ኢመፋህመት ቱ።

ምጅተመዕ መንፈዐት ሐርማዝ እግል ሰያሐት ወእተይ ዐድ ለህለ እግሉ ፈህም ሕዱድ ሰበት ገብእ፡ እምበል ምን ሐርስቤ እግል ሊሪም ህለ እግሉ፡ ምን ሚ መንፈዐት እረክብ እብ ብሕተ ወደውለት ለልብል ፈህም ምጅተመዕ ውቁል ሰበት ይዐላቱ። አዜ ላኪን እሊ እት ጌማም ለአተ በራምጅ ጽቡዋ እግሉ ህለ።

ውዛረት ሐርስ ምስል አቅሊም ጋሽ በርከ እንዴ ትፋህመት ለአግደ አሰባብ በደ ሐረምዝ ጋብእ ለዐለ ኢህለዮት ሕዛዕ ሐረምዝ እግል ባልሐት፡ 44,233 ሄክታር እንዴ ትሐዘዐ እግሉ፡ አሻይር ጋብእ እቱ። እሊ ንዛም እሊ እት ወክድ እስትዕማር ሞልያንመ ልትጋዩስ ለዐላቱ፡ እግል ሐርስ ጀራዲን ለገብእ ግብብ ቃባት እት በደ ሐዋናት ከደን ወእብ ፍንቱይ ሐረምዝ ዶር ዐቢ ሰበት ዐለ እግሉ እት አዋራፍ ሕሊል በርከ ወጋሽ ለገብእ ጀራዲን ሕዱድ እግል ለህሌ እግሉ ለአመመ ካድም ቱ።

እትሊ እግል ሐረምዝ እንዴ ትበህለ ሕዙዕ ለህለ ምድር እቱ ነብረ ለዐለዩ 1670 ዓይሉት ወ 125 ሚልከት ጀራዲን ምን እሊ አካናት እሊ እግል ልግዐዞ አማውር ህዩም ህለ፡ ገሌ ምኖም እንዴ ለአመው እብ እግል ልግዐዝ አንበተ፡ ገሌሆም ላኪን አስክ እሊ እትሊ አካናት እሊ ልትረክቦ ህለው።

እትሊ ድዋር እሊ ጀራዲን ወዱ ለዐለው 125 ሐረስቶት ዲብ 4870 ምትር መረበዕ ለልትዋገም ምድር ሐርሶ ጸንሐው። እሉም ሐረስቶት እሉም እሊ አርድ እሊ እንዴ ሐድገው እት ብዕድ አካናት ሐርሶም እግል ለአተላሉ ቱ። እምበል እሊመ እትሊ አካናት እሊ ልትወዐል ለዐለ ንዋይ ምን እሊ ድዋራት እሊ እግል ልትመነዕ ቱ።



ዮም እት ሕላይ ሰብ በዲር እለ ሕላየት ዐድ ህብቴስ እግል ንርኤቱ

እሊ ቤላ ምን ገብእ አማኑ ቱ ወኢሐሳ እሊ ሐቆ ኢቤላ ከብዱ ኔገሮት መልኦታ ሕምግሌላ እት ሮራታ ወሕምግሌላ እት ነቅፋ ሕምግሌላ ባብ-ዐጋም ለእባ ዕማር ትዘክረታ ሕምግሌላ እት ሸንን ለሃ ዲብ ሚ ልተዐስሃ ሕምግሌላ ዐታቢት እብ አክቡደን ለቀርዳ ሕምግሌላ እት አፍላግ ልትረወይሃ ለመሰዶ ድቡረን ሕቃን መዋያሁ ወአዝባዳተን ለመካ ገማሪ ወዐጽረሕ አሰማዋ አውሔ ወገብሻ ጋዝ ውብሩር መልኦ ቤለው ወበልሳ ቅርራ ወሻብሪ ለመልዴት ደሌት እብ ሓምዳ ብጋይት ትነብር ለቀርና ብሩር ወሸንካ ኢትትሐሉብ እት ሸባር ወኢትዘበዋ እብ መሐልካ ወድ ሸክ ሓምድ ነብር በዲር ምን ኢበልሳ መትጋውሐየን በዳላ ቱ፡ ሸፍፍ እለን ክም እንዳ በዐል አሓህን ሰባሳሶ ቱ ፋጼ እለን እት ሰልፋ ምሴት ለእላ እንጎምም ሕና ወኖስና ንትብሐታ ምሴት ለእላ ንትለውቅ፡እግል ስነት ንስሐቃ

እት ፍንጌ ሐረምዝ ወሐረስቶት ጀራዲን ሐርብ ለገብእ እቱ ድዋራት ጋሽ በርከ 100 ኪሎ ምትር ሪም ወ10 ኪሎ ምትር ስምዋ ለቡ አራዲቱ። እሊ ህዩ ምን ነሀር ሴቲት እንዴ አንበትከ አስክ ምዴርየት ሀይተተ ለልትመደድ ቱ።

እብሊ ህዩ ክም ምዴርየት ለዓል ጋሽ፡ ሃይተተ፡ጎን ለልትሐረክ ሐረምዝ እት ፍንጌ 120-150 ለበጽሕ እብ ሕበር ለልትሐረክ ቱ።

ሐረምዝ እብ ጠቢዐት ማይ ብዝሕ ሰበት ሰቱ ወእግል ልትሐጽብ ለሐዜ፡ እለ ጋሪት እለ እት ፍንጌ ሐረምዝ ወሰብ ንዋይ መሻክል ምን ትሰብብ ለዐለት ቱ። ሰብ ንዋይ እግል ንዋዮም ለአዳለው ዐወሊ ወሰመይት ሰበት ደፍን ወልኣኬ ምኖም፡ እት መዐረከት ዐለው። አዜ ላኪን ሐረምዝ እትሊ እግሉ ክጡዋ ለህለ አራዲ ፍንቱይ ማይ ለጽብዋ መሻርዕ እንዴ ትዳለ እት ክድመት

እግል ልውዐል እንቡት ህለ። ክም መሰል ምን ዐበ መሸርዕ ማይ እግል ሐረምዝ ርኤነ ምንጉብእ፡ እብ ማልየት ብዝሕት እግል ልትሸቄ ጠላብ ጋብእ እግሉ ለህለ ዲጋ መስቱራ ቱ፡ እሊ ዲገ እሊ ህዩ እብ ጌማም 500,000 ምትር ክዩብ፡ ማይ እግል ልጽብዋ ሰቱት ህለ።

እሊ በኑ ካፊ ሰበት ኢገብእ እት ድዋር ለነብር ሸዕብ እብ ክሰሳ መንፈዐት ሐረምዝ እት ጠቢዐት ምን ገብእ ወሰያሐት እግል ለአምሮ አትፋዝያት እግል ልግበእ ቡ፡ እምበል እሊመ እት ክል እዳረት ለህለው አንፋር ምንጉብኦ ወመሕበራት እለ ጋሪት እለ ምን ሰልፋይት አጅንደቶም እንዴ ወደወ ዝያረት እግል ሊደው እቱ ወእብ ክሰሳ እሊ መሓደራት እግል ሊደው ቦም። ክምስልሁመ ቃኑን እንዴ ኬደው እት ሐረምዝ ደረር ለሰብዞ አንፋር ለልኦደርስ ወለሰይሕ ቅራማት እግል ልግበእ እቶም ወጅብ።





ፈን ወሰሐፈት መነቲት ቶም

እተ ለሐልፊት ጥብባት ጀሪደት ኤሪትሮፕ ሐዳስ ምስል ሻብት
 እሙና ሙሳ ለወዳናህ መቃበለት እብ ክሰሱ ሄራረ እት ተባለም
 ሚ ክም መስል ሃድጋም ዐልኡ። ህተ ዲብ አስመረ ክም ትወለደት
 ወዐቤት፡ ምን 1ይ-11ይ ፈሰል ምስለ ሰልፋያም ለዐስር እት
 ፈግር መድረሰት እንዴ አትመመት ምስል 26ይት
 ደውረት ክድመት ወጠን ሳወ ክም ትከፊት
 ርእያም ዐልኡ።



እት ሳው ሆዩ ደርሰት ወናይ ክም ኣምጸኣት፡ እብ እንዲ ትደሐረት ውብረት ተዐሊም ክም እለ እቲ ክም ህሌት ሸቅል ፈን ጸብጠት እት ኩልየት ደርሰት፡ እብ ዲፕሎመ ዮም ሆዩ እት ካልኣይ ወናይ እብ ክሰብ መሻረኩት እት ፈን

12ይ ፊልስ ክም
ሸፃደት ንቅጠት
መጃል አድረሶት
እት ሸኡን ዓዳት
ትየመመት ወአስክ
አመርኩ።
ወእዕላም እንዴ
በሐተ ሰማፕ እንዴ
፡ ትደሐረት ርኤኩ።
በ ክፈለ መቃበለትነ
እማል ሕላዳ ፡፡

ሰአልአንቲ ወፈን ሚዶል ትማጽካኩም?

ወላሂ ፊን መምክን እት ደምዬ
 ሕቡዕ ዐለ መሰለኔ፤ ምን ንእሼ እለ
 እሰምዑ ለዐልኮ ተማሰል እት ራድዮ
 ክርን ገበል ኤረትርዮ እትረዳሕ ዐልኮ
 ወእግል እጃርክ እቲመ ገዮት ዐለት
 እግልዬ። ግራሁ ንኢሸ እት ኣነ ቀደም
 ሰማን ሰነት እት መጃል ፊን እብ ወለት-
 ገበደ እግል እትሓበር ቀደርኩ።

እምቤ ወሐቡቹመ እትሊ መጃል እሊ ሸቶ ሰባት ዐለው፥ ተአሲርመ ህላ እቼ ወእብ ፍንቱይ ናይ አቡቤ ክርን እት ተምሰል ሰኒ ትረይሐኒ፥ እግሊሚ አቡቤ (ሙስ መንደር) ክርን ክሊ እግል ለአምጽኦ ቀድሮ ሰባት ዐሉ ሰኒ ወአማን ለአትራክረኒ ወረዳሐኒ ዐለ።

እት ሳልሳይ ፈሰል እት እደርስ ቱ፡
ለእት ፈን እግል እትሓበር ለሰዴተኒ
ሓድሰት ወለት ንኢሸ ለትመሳሰል ምስሎም
ሌላዙ በለው ከረ ምክርጅ መሐመድ
አሰናይ፡ ግራሁ እግልዬ ትላከው
ወጀረበውኒ፡ ሰኒ ሰበት አምዳኩው እግል
እጃርክ ወበክት እግል ትፋተሕ እግልዬ
ቀድረት ለድራመ ለሀ።

ሰኣል፣ግራሁ ሆዩ?

ግራሁ እት ብዞሕ ሻረ'ኩ፤ እት ራድዮ
ልትሐላለፍ፤ ለበለ ተማሰል ራድዮ፤
ክምሰልሁመ እት ሕጭር-ሕጭር ለበለ
ተማሰል መሰረሕ እሻርክ ዐልኩ፤ ምናተ

እት ውዛረት እዕላም ለጉበኣ ወዐለ ትግራይት እቲ፡ ለትዓለ ጽበዋ ፈን ክም ዊርሳይት እንዴ ገብአኮ ምስል ፈናን አልአሚን ዑብደልጤና “ሚራሳ” ለልብ ጠባይዕ እንዴ ለበስኮ ሻረኩ።

ካሕሳይ ገብራሂወት ቱ እሊ በኩት እሊ ለሀቤኒ፡ እተ ወክድ ለሀድ፡ አናመ ይሐመቅቱ፡ ሰኒ አምጸኩወ እሊ ዝያድ ለአት-አመራተኒ ዐለት ምስል ምጽተመዐ እንድኢኩን ቀደመ እት ብዙሕ ናይ መስራሕ ተማሲል እሻርክ ዐልኩ።

ሐቅሁ እት አቁርደት ፊራሮ በልብል
 ፊልም እቱ ሻረኩ። እምበል እሊመ እት
 ደኩመንታሪ ፊልም አግደ ጠባይዕ በህለት
 ከም “ራየት” እንዴ ገብአኩ መሰልኩ።
 እግል እመሰለ እቀድር መኢፋሉ እንዴ
 እኔ እፈርህ ዐልኩ። እግልጤ፣ ኣነ ለናይ
 አማን ሽዑር ራየት እንዴ ጸባየት እግል
 እመሰል ክቡድ ሰቡት ዐለ።

እሊ. ፊልሞ እሊ. እት አትአማርዬ
ምስል ምጅተመዕ እዬ ዛይደት ለበለት
እግላቱ፤ እትሊ ዕምር እሊ እት ሀሌኩ፤
እግልሚ ለአግደ ዶር እት ራዩት ሰበት
ዐለ እግልዬቱ።

ሰላልኡብ ክሰብ ሕላይ ህዩ ሚ ትብሊኑ?

በዲሮ እት ሕላይ እግል እሸቄቱ ለልብል ራህም ይወለ እግልዬ። እት ሰነት 2014 እሴታዝ መሐመድ ሰራድ ዑሰማን ሽዕር ወለሐን እንዴ አትዳለ።

“እ’ለ ሕላየት እ’ለ ጀረበ” ቤሊኒ። ሰበቡ ሆዩ፡ እት 25ይት ሰነት ዐመልየት ፈንቅል እግ’ለ ለትሸርሕ ሰበት ዐለት። እተ ሰልፍ ፈርሆ ምን እግልማ፡ ሕላይ ናይ ኖሱ ቀሞኒን ሰበት ቡ ወእንዳ ጀረብኸው ሰኪኮ ምኑ፡ “ይእቀድረ እበሉ”፡ ሁቱ ላኪን እንዳ ኢልትሐለል “አብሸርኪ ጀርበ፡ ለጀረበ ልትዐውት” እንዳ ቤሊኒ፡ እት ምሮት ሙሲቃር ነሰኤኒ፡ ሻም ለልትበህል ምን ናርቀት አሰር ቱ ወህቱ ተማሪን ለአውዳኒ ዐሉ፡ ግረሁ ሰበት ደረግኹ እተ መልክኩ ወእት እሕትፋል 25ይት ሰነት ተሐረር ፈንቅል ሐሌኩው “መቐጠን ኤማን” ትብል ዐለት ላኪን እብ“አብለለ” ለትትአመር ለሕላየት።

ሰአልክሙን ወክላሉ ሚ ዶል ተላላው ንብክ?

ወላሂ ምን ንእኼ እት በርናምኛ አጅኒት አንበትኩ። ግራሁ ህዩ እት ለትፈናተ ተማሰል ራድዋ ወበዕድ በራምኛ እቱ እት እሻርክ ምን ሳልሳይ ፈሰል አስክ ሳወ እትካሬ እት እዕላም እሽቄ ዐልኩ። እት ክም ቅራኣት አክብር፡ ለትፈናተ በርምኛ ቁርኣይት ወመዳልያይት፡ ክምሰልሁመ እት በርናምኛ ሸባባት ክም መቀድማይት በርናምኛ ሸባባት ወመዳልያይት፡ አዜመ ክም ቁርኣይት አክብር ወቁርኣይት አክብር ሳምን፡ ዓናዩት ወበዕድ ጸበቦ ራድዋ እቱ እሻርክ ህሉኩ። እሊመ ምን ዋልዳዬ ለወረሰኩዉ ቲ። አዜመ እትሊ መጃል እሊ እግል እክደምቱ ምስላ ፈን እንዴ ከተርከዉ ረቢ ልስዬኒ በል።

ሰአል፤ ፈን ወእሳም ሚ መትዳየየ
ቡ ትብሊ፤ ምሰል ተጃርብኪ ዶል
ትቃሪ?

ፊን ወእዕላም ምን ሕድ
ለኢልትፈረን መካቲት እግል ኒበሎም
ቀልል እግልነ። ምናተ ፊን ቀደም
እዕላም እንብትቱ ሰቡት ዐልኩ፤ እግል
ሕጠር ሰዲኒ። ሱሓፊት ህዬ ሐጠር
ሰቡት ተሐዜ ለፊን ሰዲኒ። ንኣይሽ እት
ህሉን “ኣብዕብነ ኬርቡ” ለዐለ ጽበዋ
በርናምጅ ኣጅኒት እንቀርእ ዐልኩ
ግራሁ ህዬ ሰቡት ትናየትነ ለትፈናተ
ዒማት እንዴ ፈተሽኩ እግል እክተብ
ሰዲኒ።

ሰላል፡ እት ፈን ትግራይት አንብቲ ከፎ ሀለዩ ትብሊ?

አንሳት እት መጃል ፈን፡ ሕላዩ
ልግበእ ወተምሲሉ ክምሰለ ልትሐኪ
ይህለዩ፡ ለሰብ ምጅተመዐናቲ፡
ምጅተመዐነ ለአትሳጅዐን ሰቡ ይህላ
ቲ።

ፊን እብ ገበይ ጥውርት ሐያት
ምጅተመዕነ ለቀድሞ ወለልሐብር ቲ።
ሰኔቱ ለረሸድ፡ እኩይ ዓዳቱ ወለመድ
ለሰቅቅ ጽዋር ሓምል ቲ። ምጅተመዕነ
እሊ እንዴ ፈላጊ ሀንሳት እትሊ መጽል
እሊ እግል ለሕጎናይተን ቡ።

ፊን መደርስ ወመዐፍዩት ሐዮት ቲ። እሊ ሰበት ገብእ ሐዮትን እበዩ ገበይ ትፃርር ህሉት እት'ለ መዐፍዩት እለ ሰበት ነዐፍ ምጅተመዕ ዶሩ እግል ልቀደም ላዝም ቲ። ሀደፍ ፊን ህዬ ምጅተመዕ እግል ልጠወር ወልትቀደም ለሸቂ ሰበት ገብኡ፡ እግል ልትኣ'ቤ ኦለቡ።

**ሰላል፡ እት ፈን ለህላ እግልኪ
በርናምጅ ከፎ መሰል?**

ሻብት እውነት መሰረት
እነ እነት ሕላይ ወተማሰሊ ዝያድ
እግል እክደም በርናምጅ ብዬ፡ እብ
ፍንቱይ ሀዬ እት ተማሰሊ ወናይ
ፊልም እክራጅ እግል ፅቤ ገዮት ሀሌት
እግልዬ። ገዮት ሀዬ እብ ሽቅል እንዴ
ተሌት እት ፍፅል ሰበት ትትረኢ እግል
እሊ ሀደፍ እሊ እግል እብጸሕ እብ
ክሰት እሊ መጃል እሊ በሀሉት እት
ዳይሬክቲን ለተገነበ ድናት እግል እንሰእ
ቲ ለእትሸብ። ክምሰልሁ መምከርጅ
እግል ትግበእ ገብአክ ምንገብእ፡ አሰልፍ
መመሰል እግል ትግበእ ሰበት ብዬ፡ እብ
ገበይ ተምሰልመ እግል እትቀደም ምን
እብ እህትማም እግል እሸቀ እቲ ሳተት
ለሀሊኩ በርናምጅ ቲ።

ለአል፡ እት ሰማፕ ለነሰአክዩ ድረሰ
አክል አዩ ነፍዴኒ ትብሊ?
ብዙሐ ሐጃት ረከቡክ ምኑ።



መምከን ቀደም እለ እብ ተጃርብ ሌጠ
 አምሩ ለዐልኮ መጃል፡ አዜ እብ ድሩሰ
 እት መዕሐድ ሰማየ ሰቡ ከሰብከዉ
 ክሉ ለሸቅል እብ ገበይ ድራሰት እግል
 ኣተላልዩ ሰፄኒ ለእግለ ይአምር ኣመርኮ
 እቡ።

ክሉ ምስል ፊን ለትጸበጠ ሰቡት ዐለ
ህይወት መጃል ፊን እት እሰወ. ክፈል
እግል እሸቄ ከም እቀድር፡ ከምስልህ-መ
እት መጃል ሕላይ ሰኒ እግል ሕሌ
ለሰዲኒ ደርሰ ራክብት ምት ህለኩ፡ ብዞሕ
ቲ ምን እሊ ድናሰ እሊ ለረከብኩወ.
ዕልም።

**ሰላል፡ ምን ሻረ'ኪ እቱ ጽበዮ ፈን
ምን ተሐብሪን?**

ወላሂ ብዙሕ ቱ እግል እዘዘኩ ይቆያድር፡ ምናተ እት ተማሲል፡ ተምሲልየት ኡዳል፡ተምሲልየት እት ወዐለ ትግራይት ዕግል፡ ተምሲልየት ወለት ሕደጋት እዬ፡ ተምሲልየት ዕጩት እት ቅርደት ትወድቅ፡ ተምሲልየት መስከብ በርኩት፡ ደትመንታሪ ፍልም ራየት፡ ምን ሕላይ ወለት ሕደጋት እዬ እተ ጭራም ሕላየት ዐለት እግልዬ፡ ክም ፈናኒት እት መጃል ሕላይ ሕላየት ታመት ለሐሌኮ እበ እለ ናይ ፊንቅል “መቅጠን ኡማን” ለትብል ተ። ብድሆን ለትብል ዐለት፡ እትዬ ኖሰ ለትብል ምሰል ሐርየ ኢብራሂም ለሐሌክወ፡ ሕድት ኖሰኝ ትከፌ፡’ነ ለትብል ሕላየት ምሰል ሐሰን ዐብደለ ክምሰልሁመ ምሰል መንሰር ፈሆሚ ወሐቱ ብዕደት፡ አሴርርን ለትብል ወአዚ ህዩ እብ ጀላክ ምድር ጸብሐ ለትብል ሕላየት ሐዳሰ እብ ክለፕ ሻቅየት ህሌኮ ወምሰል ብዘጣም ፈናኒን ክም መትኩበታይት እንዲ ገብአኩመ ሐሌኩ።

ምን ፊልም እለ ናይ ራዮት እፊቲ፡
እዓልማ፡ ሸዑር ራዮት እዓል እልበበ
ለአወጠንኹ ዲቡ ወለትዐወትኩ እቲ
ፊልም ሰበት ዐለ፡ እት መሀረጃንመ
ጌይት ደረጃት ራኩብ ዐለ ለፊልም
ለሀይ።

ክምሰልሁሙ ምን ሕላይ እለ
“ዎክብለለ” እበ ለትትኣመር ሕላየት
እፈፈ ለኣንበትት እበ ሰበት ገብኣት ክም
ፈናኒት።

ሰአል፡ ሻቦት እመነ ሕላይ ሻም ተሐሌ፡ ምስሉ ሚ መትዳበዋ በ?

ወላጂ አስከን እለ ምስል ሻም ለጉብኣት ዕላቀት አሉብዬ። ሸዕር ትትህየብኒ ወሕላየት ወእነ ህዬ እበ ትትቀደረኒተ እግል እመስል እተ እጀርብ ወሐሌ እትኢኮን እት ሻም እንዴ ቱቅቦ ለሐልዬ ሕላይ አለብኒ። እበ ትትቀደረኒ ክምስለ በዐለ ሸዕር ለእንዴ ትጉብኣ አው እንዴ ረኣ ለልሸዕር እንዴ ትወጀህ እግል ንሹቄ እንጀርብ ክምስለ እት ሻም

ሻሂ ምስል ሐሊብ እግል ዓፈዶትክ እት ብቆት ከርዩ!

ዑለመ እግል ቡን ወሻሂ እንዴ አትባደረው፡፡ አዬ ምኖም እግል ገሮብ ዝያድ መደረት ወዲ እግል ልድለው ድራሰት አትጋዩሰው፡፡ እለ እብ ናይ ውሑዳት ውሓዶት አሚሪክ ዑለመ ለገአት ድራሰት ለሀቡት ፍገሪት፡ ሻሂ ለበኒ እግል ገሮብ ሐበትመ መንፈዐት ክም አለቡ ሸርሐት፡፡ ወእምበል እሊመ እለ እብ እሎም ዑለመ ለትጋዩሰት ድራሰት ክመ ሐበረቲ፡ ቡን ዝያድ ካብ ምን ሻሂ መንፈዐት ክም በ አከደት፡፡

ወዲብ ሻሂ ወቡን ለትትረከብ ንሰበት ካፋዩን አክለ እግል ገሮብ

መንፈዐት ለሀሀይብ ማግኒዝዮም ክም ትገብእ ትሸረሐ፡፡ እለ በህለት ክል ፍጃን ቡን ንሰበት 0.6 ግራም ፕሮቲን ወ 1% ምነ ዲብ ሻሂ ለኢልትረከብ ካልሰዮም ብዲቡ፡፡

ወእት ረአሰ እሊመ እት ቡን ምነ ልትረከብ ጽቡዮ፡ 1.4% ምነ ፍሰፈሮስ፡ ወ4% ምነ ማደት ኮሊን (እለ ማደት እለ እግለ ቀረፍላ ዋህዩታት መንፈዐት ለብዲብ ማደት ተ) ወ 7% ምነ ቦታሰዮም ልትረከብ ዲብ ዲብ ህለው፡ ምነ እለን መዋድ እለን እት ቀበት ሻሂ ለልትረከብ አሰር ሕድ 0.5% ፡ 0.5%፡ ወ 5% ገቦኡ፡፡

ለዎሮት ጋር ለእት ሻሂ ምን ቡን ወለዐል ልትረከብ ህዬ ምን ፎሊክ አሰድ ለትትረከብ እቲ ንሰበት ተ፡ ከዲብ ሻሂ ምን እሊ አሰድ እሊ ንሰበት 6% ትትረከብ እት ህሌት ዲብ ቡን ህዬ 2% ትብጹሕ፡፡

ወእምበል እሊመ ለድራሰት ለአከደቲ ጋር፡ ሻሂ ምስል ሐሊብ ዶል ልትሰቲ ፋኢደት ክም አለቡ ተአመረ፡ እሊ ህዬ ለሐሊብ እግለ እግል ሸሂ ወቡን ዎሮቶም ተ ከእብ በይነ እትለ ልትነሰእ እቲ ወቅት ለትትረከብ ምኖም መንፈዐት በላሽ ክም ትብዴ ወድዮ፡፡



እብር ሰእዮት ምን እዕዳም እብ ሞት ለአከ

ዎሮት መልክ እግል ክልኦት ነፈር ለዓሩዱ ሰበት ዐለው እብ እዕዳም ሐክመ ዲቦም፡፡ ወእሊ ሐክም እሊ እት ረእሶም እግል ልትነፈዝ፡ ምነ ምዕል ለእተ ፈግረ ሐቆ ዎሮት ወሬሕ ሐደደ እሉ፡፡ ከዎሮት ምን እሎም ክልኦት ነፈር ክለ ለእዲን እንዴ ጸብረ እት ዎሮት ርክን ናይለ ሰጅን ክርክሚት ጋብእ እት እንቲ እንዴ ትገሰ እትለ አነነቲ እት በኪ ወጃምም እግለ ምዕለ እዕዳም ልታኬ ዐሊ.ለዎሮት ህዬ ሰኒ ፈዳብ ወለቢብ ሰበት ዐለ፡ ሐቲ ገበይ ምን አመረ ምን እለ ዲብ ክሩይ ለሀለ መለገት ለትባልሐ፡ አውመ ህዬ ምን አመረ አምዳላት ዲብ እለ እዲን ክም ወሰክ ለትወድዩ ዲብ እት ፈክር አንበዮ፡፡

ሐቲ ላሊ እብ በይነ ግሱይ እት እንቲ እብ ክሰሰለ መልክ እት ለሐሰብ አምሴ ለመልክ ሚ ፈቲ ወሚ ለአቤ ተማም ለጠባይዑ እብ ሐት ሐቲ እት ለአትዋይን መደት ረያም ሐሰቡ፡፡ ሐር እግለ ፈረሱ አክል አዬ ክም ፈተዩ፡ ወምስል እሊ ፈረሱ አክል አዬ ወቅት ለአብዴ ወምስሉ እትለ ሻሬሕ ተሐት ወለዐል ልብል ክም ዐለ ፈቅደ፡፡ ሐር ገሌ ፍክረት ተቀብ ሰበት ቤለቲ፡ ክርንቲ እንዴ ወቀለ እግል ሰጃን እንዴ ትላከ፡ ዎሮት ሰኒ ምህም ላቲ ጋር እግለ መልክ እግል ልድገሙ ለወጅቡ ሰበት ፈቅደ፡ ምስለ መልክ እግል ለአትራክቡ ትሰአለዩ፡፡ ዶለ ሰልፍ ለሰጃን አበ እሉ፡ ምናተ ሐር ለጠለቡ አሰክለ መልክ አብጸሐዩ እሉ፡፡ ለመልክ ምን አመረ እብ ክሰሰ ብዕዳም መዓርዲን ገሌ ሐብሬ እግል ለሀበኒ ገብእ ሐዘ ቤለ ወእግል ልቃብሉ እጃዘት ሀበዩ፡፡

ለመልክ እግለ ነፈር፡ እሊ ሰኒ ምህም ቲ ትብሉ ለህሌክ ጋር ሚ ቱ? እት ልብል ተሰአለዩ፡ ለእናሰ ህዬ፡ አነ መደት ሰነት ለትገብእ በክት ሀብከኒ ምን ገብእ፡ እግል

እሊ ፈረሰክ ከፎ እት ሰመ ክም ለዐውል እግል ዐልሙ እግልክ እቀድር ቤለዩ፡፡ ወገሌ ናይ ሰሕር ወእሉ ለመሰል ወድ አደሚ እግል ልውደዮም ለኢቀድር ብዝሓም ናይ ምስተኸር አድጋማት ሓክ እሉ፡፡

ሐቆ እለ መልክ ርሐ ዲብለ ለዐውል ለሀለ ፈረሰ ጽዑን እት እንቲ ወህቲ ዲብ እለ ዲን መሰሉ ክም አለቡ ሰበት ትዋሰፈት እሉ፡፡ ህግደለ እናሰ ዲብ ዋፈቀ፡፡ ለመለህዩ ህዬ እሊ ከበር እሊ ክም ሰምዐ ሰኒ ተፍክረ ወትዐጀቡ፡፡

ለእናሰ ሐር ክም ዐቅብሉ፡ ለመለህዩ ህዬ፡ እንተ ፈረሰ እት ሰመ እግል ልዑል ክም ኢቀድር አክል ሕድ ተአምር፡ ከእለ ናይ ዐያዩን ለትመሰል ፍክረት እብ ኮፎ አምጸእካህ ቤለዩ?!

ለእናሰ ህዬ፡ እለ ሰኒ አምረ ህሌኩ፡ ምናተ አነ እብለ ገበይ እለ እግል ርሕዬ ሕርዩት ለእረከብ እቡ ዎሮት ምን አርበዕ በክት ፋቲሕ እለ ህሌኩ፡ እት ሰልፍ ክሎም ምን አመረ እት ቀበት እለ ሰነት ለመልክ መይት ገብእ፡፡ ለካልኣይ በክት ህዬ ምን አመረ እት ቀበት እለ ሰነት እለ አናመ እመይት ኢኮን፡ ከሕኔት እብ እዕዳም እንዴ ትቀተልኮ እመይት እት ዐራትዬ ካርር እት አነ ክም ክሉ አዳም ዶል እመይት ምን መትቀታል ኢልትፈደል መሰለክ? ወለሳልሳይ በክት ህዬ ምን አመረ ለፈረሰመ መይት ገብእ፡፡ ወለራብዓይ በክትዬ ህዬ፡ ምን አመረ ረቢ ሰዴኒ ከለፈረሰ ዐዊል ዐልሙ !! ቤለዩ፡፡

ምን እሊ ለእንደርሱ፡ ክል ዶል ቡቲክ ሰእዮት መንገአት እግል ንፍተሕ እለ አለብኩ፡ ሰእዮት ክል ዶል እግል ነአትናይተ ብዲብኩ፡ ወእባክ በደል እንፈሸል እንዴ ጀረብክ ከሐቆ ጀርቤ ዶል እንፈሸል ልትፈደል...ሰእዮት ህዬ በርሀት ሰበት ተ፡ ክል ዶል ሰእዮት ኢንብተክ፡፡

ፍንቱያት መዕሉማት

- “ኦኬ” ለሰልፋይት እት ረአሰ ወሬሕ ለትበህለት ዘዐት ተ፡፡
- ምን ሰር ሰካን ምድር ወለዐል ለገቦኦ አንፋር ምን ጽልመት ፈረሆ፡፡
- ሕዲነ ሰካብ፡ እት መሰምስ ሐምቅ ሰሓቅ ለኢለአስትህለ፡፡ ወእብ ገበይ ጉኒት ክም ትትሰሐቅ እግል ሊዴክ ቀድር፡፡
- ደውረት እግል በርሀት ጽቤሕ ምድር ቀደም ወድ አደሚ እብ 45 ደጊገት ለልርኡ እበ ቅድረት ቦም፡፡
- ጼነ ጃዝ መካይን እግለ እት ሐንገል ለልትረከብ መርከዝ ምትዐት ወድ አደሚ ዲቡ ታእሲር ሰበት ወዴ፡ እብሊ ሰበብ ቲ ብዝሓም ለልትመቶዩ እቡ፡፡
- ሐት ሐቲ ዶል ሐቲ ሕላዮት እት ረአሰነ ተቀብ ትብለነ፡፡ ወለተልሒነ አምዕል እብ ግዲደ እት እንደግሙ እንወዕል፡፡ ምናተ ሰምለ ሕላዮት ወለዲብ ህለ ፈርዶት መዘዖታት ክሉ-ረእሱ ይእንፈቅዱ፡፡
- ሞዝ እግል ንትሰሐቅ ለትሰዴነ ማደት ትትረክኩብ እቲ፡፡
- እብ ህግዩ ታይላንደ ዕልብ 5 “ሃ” ልትበህል፡፡ ከ 555 እግል ቲበል ሐዜክ ምን ገብእ “ሃሃሃ”



- ድቁብ ክል ዶል እግለ ሐርብ ለክሰብ ኢኮን፡፡ ምናተ ሐምቅ ክል ዶል እግል ሰላም ለክሰር ቲ፡፡
- አሰማይ ክርስ ሸዩም ናይ ሐምቃም ሰርጎ ቲ፡ ሰብ ለፈዳብ ላተ እምበል አሳሚሆም እት ሐቲመ መሕዝዝ አለቦም፡፡
- ዕጪት ለፈቲ እግል አቅሹነ ፈቲ፡ ከሰላም እብ ሐርብ እንዴ ኢትገብእ እብ መፋህመት ቲ ለእንረክበ፡፡
- ፍትሕ ምን ገጽ ምድር ሐቆ ትገልጸጸ፡ ህለዮት ወድ አደሚ ሐበትመ ምን ቂመት አለቡ፡፡
- ለውቀት ክል ዶል ክም ሸንህትክ ሰበት ወዴክ ኢኮን ለትረክበ፡ ለውቀት ለእለ ትትሸነህ ዶል ትወዴ ቲ ለትረክበ፡፡

ዝበድ ዘዖታት

ነፍሰክ እግል ተአትሓይሰ “ድንጉር ወቅት ለልትበህል ይህለ” ወእትለ ሔሰት ደረጃ እግል ትብጸሕ ፍንቱይ ዕምር ኢለአትሐዜክ፡ ልብክ ለሀንድግ አሰክመ ህለ አሰክ እለ ለበክት እት እዴክ ህለ፡፡

መዕሉመት

- እብ ምግባይት ደረጀት፡ ለገብእ ነፈር ሰለሰ እግል ዎሮትመ ለኢለአስእሎም ምስጢራት ቡ፡ ወምን አመረ ጡል ሐያቲመ ኢለአስእል እቦም ገብእ፡፡

ከፎ ሕሰበት ታመት ትበልሰ?

ዎሮት ምደርሰ እት ፈሰል እንዴ አተ፡ እትለ ቅብላትለ ደረሳሁ እግል መደቲት እንዴ በጥረ ከክእነ ቤለ፡ “ሰርኩም ዓቅላም እንቲም”፡፡

ኩሎም ለደረሰ ለአግጹቶም በርህ ወለውቀት ትሰመዓቶም፡፡

አሰሩ ለፈሰል ምደርሰ ብዕድ አተ ዲቡ፡ ህቲ ህዬ ክምእነ ቤለ፡ “ሰርኩምዲ ሐበት ምን ዐቅል አለብኩም”፡፡

ለደረሰ ክላቶም ሐርቀው፡ ወእኩይ ትሰመዐዮም ወለኢፋሉታይት ጠቢዐትለ ምደርሶም አትዐገበወ!

ከለአማን ዶል እንርኤ ላተ..ክሊቶም ለምደርሲን ሐቲ መዕነት ተ ለእለ ቤለው፡ ምናተ ፍንቲት ህሌት ምን ገብእ ለግራብ አውመ ለገበይ ለእበ ትቀደመ ሌጣ ተ፡፡

ከሕሰበት ታመት እትለ እንበልሰ እቲ ወቅት፡ ከፎ ክም እንብለ አምር ወዐገል ለአትሐዜ፡ ከዐገል ህግዩ ነአምር፡፡

ልብ ክሬ እሎም

- አፍካርክ ልብ ክሬ እሎም፡ እሎም አፍካር እሎም ሰበት ቶም ለሐር እት አፍዓል ለልትበደሉ፡፡
- አፍዓልካመ ራቅቦም፡ ሐር ህቶም ሰበት ቶም ለእት ዓዳት ለልትበደሉ፡፡
- ላመ ዓዳትክ ልብክ ክሬ እቶም ህቶም ሰበት ቶም ለሐር እት ጠባዬዕ ለልትበደሉ፡፡
- ጣባዬዕካመ ረአዮም ሐር ህቶም ቶም ለመሲርክ ቀርሮ፡፡



(ፊደ ክፋል)

ሰሚረ ለዳርግ ኑብር ለዐለ ንሳለ እትለ ደረጀት እለ እንዴ በጽሐ ለአማን እግል ኢለአሰእል ትለተተ ከወትኣ። ህግያህ እንዴ ትትካረም ወትትቃረጭ ምነ ህዩ “ዑ---መ-- -ር፣ ማሌ ምሴት ኣነ ወእንተ ምስል እንዴ እንበጥር ዑብዱ ሐዬ ምን ቃብል ረኤነ። ወክምሰለ መሀዲ ለራክብ ክም ዔረ እግል ኣቡዬ ኣሰኣለ እብነ። ወኣቡዬ ሕሳብ እኩይ ሓሰብ እግልክ ሆለ” ዑመር እንዴ ኢልትሻቀል ወኢፈርህ፡ እት ምግብ ህግያህ እንዴ ኦዳለቀ፡ “ለእኩይ ሕሳብ ኣቡዬ ትቢሉ ለህሌኪ ሚቲ?” ኣዜመ በለሰለ ሰኣሉ ትጸበረ ምነ።

“ኣቡዬ ለከበር ሐቆ ሰምዐ ሐሩቀቱ ሐ’ደ ሐልፈትክ ኢትደረረ ወዲብ ደንጎበ ለሀለ እግሉ ሕሳብ እግል ልቅተለክ ኖዊ ሆለ” ዑመር እሰልፍ እብ ሰሓቅ በረቴዕ ገብአ ወሐሬ፡ ለሰሚረ ትምሕጽ እቡ ማሰዩት ለዐለት ከበር እሊ ለሰምዐዩ ምን ገብእ፡ ክቡድ ክም ኢኮን እንዴ ቀብቡ፡ “ሰሚረ፡ ማሌ ምሴት ምስል እንዴ ሕነ ዑብዱ ሐዬ ረኤነ ወኣቡዬ ኣሰኣለ እብነ ትብሊ ህሌኪ። ከእንቲ፡ ኣቡኪ እግል ልቅተለኒ ሓሰብ ክም ሆለ ምን ኣሰኣሌኪ ወእብ ከአፎ ኣመርኪ ወለ እብ ተሀምቱ ትትሃገይ ለህሌኪ?” ምን ኣማንለ ከበር እግል ልትኣከድ ትሰኣለዩ፡ “ዑመር፡ እብ ተሀመት ኢኮን ወእብ ኣትማራር፡ ለሕሳብ ሓሰብ ለሀለ ኣቡዬ ዋልዳዬቲ። ኣክል እለ እግልሚ ኣኩብድ ዲቡ ከኣርወሐቼ ዘንብ ኣረፈዕ ወእግሉ ዲብ ጀሪመት እክርዩ?ኣነ ለፊታን ዑብዱ ሐዬ ለዔራቡ ከበር ኣቡዬ ክም ኣሰኣለዩ ኣምረት ሰበት ዐልኮ ምን ጽባቤሕ ምስኩቡ በጽሐኮ ምናተ፡ ሹቅልት ሰበት ዐልኮ ሰኩብ ወኣነ ክልኤ ገበይ ትናሰኣነ።

ኣቡዬ ኣልዕሸ ሳክባም ገብአ እንዴ ቤለ፡ “እሊ ሕጻን እሊ ምን ኣሰር እለ ወለት እግል ነኣትርፉ ገብኣነ ምን ገብእ እምበል ቅታሉ በሰር ብዕድ ኣለቡ!” ዲብ ልብል እግል እምዩ ኣደሐ ጸዐደ ኣሰኣለዩ፡ ምናተ እምዩ ከ’ልጥ ክም ሀለ ምንመ ትቃወመቱ ህግያህ ተርጀመት ኢህበዩ፡ ወለ ሓሰቡ ለሀለ ሕሳብ ዲብ ፍዕል እግል ለኣውዕል ብገሰ ክም ሆለ ህዩ ኣነ ኖሼ እብ እዘንዩ ሰምዐኩሁ፡ ኣሀ ኣዜ ህዩ ተኣከድከ?” ህታመ እብ ተረተ ትሰኣለቱ ወኣርወሐተ ሸበህ ምነ ለዐለተ ተሐጢጠረት ወዘግነት ከእብ እጥምእኖን ገንሐቱ ወሐሬ እንዴ ኣትሌት፡ “ዑመር ዮም ሱግ ካሪዬ ለዐለ እሊ ከበር እሊቱ። ምን ሐረስ እሊ ሕሳብክ ውዴ፡ ትደገግ፡ ቀበት ሳክባም ትረህ፡ ቀበት ህሙላም መንተብህ ግበእ! ኣነ ህዩ ክም ኢረከብኩክ ኣሕመድ ኣሰኣለኮ፡ ምናተ እግርዬ ታሊዬ ኢዐለ፤ ኣዜ ኣሰናይ ትራኩብነ!

ሰ’መዕ ክልኣት ከበር

ለህሌት አማን እ’ላተ። ኣዜ ኣነ እሸፍግ ህሌኮ እግል ዒርቱ ኣዜመ ለዐቅቡኒ እምበል ሚለህሉ?” ትቤክ እግል መዐሰላመ ለእልብ ራዊ ለመሰለ ኣጩብግተ ዲብ ኣጫቤዕ ዑመር እንዴ ሓበረተን ዕልበን ምን ሐም-ሐምስ ኦር-ኦሮት ዲብ ዐሰር ናይ ሕበር ኣጫቤዕ ወቀለወን፤

ዑመር እ’በ ለሰማዕዩ ከበር ሕዩር ወእበ ሻፍግ መትሳርሐተ ሹቁል እንዴ እንቲ፡ “እሰልፍ ሐምደኪ ወኣሰናይ ኣሰኣልኪኒ ሰሚረ። እንቲ ህዩ ገለብ ደሐንዬ ሰበት ገብኣኪ ወሰኔቼ ምን ሐዜኪቱ እንድኢኮን እብ ምስጢር ኣቡኪ ትትለሐይ ወኢፈቱኪ። እንቲ ኢትትሻቀሊ፤ ኦዳም እንዴ ቀተልኮ እብ እንቅዕራርዬ እንዴ እሰክብ እግል እትመዬቱ ለቤለ ህዩ፡ ተሐይሰ እግልዬ ምን በዐላተ። ወለነሰኣ ምስዳር ህዩ ሕበር እግል ንርኢያቱ፤ ሕነ ህዩ ኣሰር ሕሳል ሻም ኣልባብነ ወትምኔት መስተቅበልነ ትዋሊነ ሊኢኮን ለወዴናህ ጀሪመት ክም ኢህሌት እንቲ ኖሰኪ ተኣምሪ በሰ እንቲ ምነ መብደእኪ ለቀዳም እግል ትቀይሪ ኣለብኪ። ምናተ ለእግልዬ ተኣትፈክር ለህሌት ጋሪት----”

ህግያሁ እንዴ ኢለኣተምም፡ እተ ክም ፍሊት ጋልበት እንዴ ለኣፋዝዝ ርዕብ ሐዲሰ ልትረኤ ዲቡ ለዐለ ዕንታት ሰሚረ በል ኣበለ፤ “ዑመር ትዘመትነ ኣቡዬ መጸኣነ ሀለ ጨበል ነሰኣነ ሌጠ! ዕምርነ ሐጭረ! ሸፈግ እሊ ወደግ ድነን ከእብ እግር ፈረሰክ ፍገር!” እንዴ ቴለቱ እዴህ ነዘዐት ምኑክ ለእት ቀብቱ ለዐለው ሰዐር ሻፍቅ እንዴ ትገልበበው፡ ኦሮቶምክ እብ እንክር ኦሮት እብ ፊሕ ኣፍግር ትፈንጠረው፤ በክቶም እንዴ ሰነ ላኪን፡ እት ፍንጌ ዕንታት ኣብ ሰሚረ ወለ ምስል በጥሮ ለዐለው ዑመር ወወለቱ ሰሚረ፡ ሸመት ጽልመት ኣደሐ እንዴ ትከፊት ሰበት ኢረኣዮም ምነ ብቆት ሻፍገት ረቢ ሐጅቡዮምክ ኦሮቶምክ ለኣ’መ ለዐለ ኣካን በጽሐ፤

ኣብ ዑመር ሸሂድ ሰበት ገብኣ፡ ዋልደይት ዑመር ወልደ ዲብ ለትወቀለት ደረጀት እንዴ በጽሐ ወእብ ምህነት እንዴ ትደሕረ ኦሮት ኣክል ኣልፍ እግል ልግብእ እግላ ወእግል መስተቅበሉ ወመስተቅበል ዐ’ዱ ክም ገብእ ላሊ ወኣምዕል እብ ክለ ሐለተ ትትጸገም ሰበት ዐለት፡ ዲብ ተዐሊም ዑመር ወልደ ንዮተ ወትምኔተ ጌዳን ኢዐለ እግላ፤ እለ ትምኔት እለ ላኪን ማይ ክም መሀጸት ወትምኔት እ’ሙ ትምኔት ው’ላድ መካን ክም ተገብእ ለወደዩ ዑመር ኖሱ ክምሰልቱ ለለኣምሮ፡ ህቱ ኖሱ ወገሌ መሳኒቱ ወሙደርሲኑ ሌጠ ምን ኢገብኦ ብዕዳም ለለኣሙሩ

ኢዐለው፣ዋልደይቱ ለድራሰት ክም ኣትካረመ ሰኒ ትሻቀለት ወሐዝነት። እንዴ ኢትትሐለል፡ ዲብ መደረሰቱ እንዴ ኣቅበለ እግል ለኣተላሌ ወህተ ምስል ለከሰሎም ጀሃት እግል ትትፋሀም እግሉ ክምሰልተ ምንመ ረምቀቱ ወኣትሓሌቱ ህቱ ላተ፡ መድረሰት ለልቡለ ክም ኢገይሱ፤ ወኣሰከ እንዴ ቤለ ሽብር ክም ኢሸብር፡ ለዲብ ምህሮ ለዐለት እግሉ ትምኔት ዕቅረት ተናን ክም ገብኣት ሰበት ኣጽብረዩ፡ እንዴ ኢትፈቱ፡ ዲብ ኣሸቃል ብዕድ እንዴ ትፈረረ ኣርወሐቱ ወዐዱ እግል ልክረዕ ክምቡ ሐበረቱ፤ ወእብላሁ ዶል እት ሸቅል ጸሊም እንዴ ልትፈረር ወዶልመ ዲብ ሸዋሬዕለ መዲነት ቀረፍ ኣንፍ ርእያዩ ወሴምዳዩ ጋብእ እንዴ እንቲ፡ ለዐበ ሸቅሉ ዓቅቢት ሰሚረ ሌጠ ገብኣ፤

ዑመር ምን ሰሚረ ክም ትሳርሐ፡ እብ ፈርህት ምን ኣብ ሰሚረ መጅብ እብ ደነብር እንዴ ለዐውል ዲብ መለሀዩ ኣሕመድ ክማም ገብኣ። ኣሕመድ ወህቱ ሰላም ሐቆ ትበዳደለው፡ ለሰሚረ ለደግመቱ እግሉ ከበር ሐቴ-እብ ሐቴ ኣሰኣለዩ፤ ክም መሳኒት ህዩ፡ ሚ ምስዳር እግል ልንሰኣ ክም ቦም እንዴ ኣቆረው ትጋመው፤ ዲብ ደንጎበ ህዩ፡ ምነ ለሀድገው እቡ ኣብሳር ብዞሕ ዲብ ኦሮት ኣተፈቀው፤

እንዴ ልትደገነ፡ እተ ዑመር ለሸቄ ዲቡ ባካት፡ ኣብ ሰሚረ እንዴ መጽኢ ምን ዑመር ትሰኣለ ምን ገብእ፡ ሚ ወቅት መጽኢ፡ እግልሚ ልትሰኣል እቡ ክም ሀሌ፡ ሚ ጸብጥ ክም ዐለ፡ እብ ሚ እንዴ ኣመስመሰ ልትሰኣል እቡ ዐለ? እት ወቅት ፊራርቱ ለልትሰኣል እቡ ወለ ዲብ ወቅት ምዕያር? ውበዕድ በሐሰ እግል ሊደው ወሐብሬ እግል ለኣክቦ ትዋፈቀው፤ ለሐብሬ ላኪን እብ ኣሕመድ ወዑመር እንዴ ኢትገብእ፡ ምነ እተ ባካት ንዋዮም ለልርዑ ሰብ ንዋይ መንደሊታት ነዘመው ወእት ኣካንለ ለለኣመጽኢው እግሉም ሐብሬ ህቶም ደርህም እግል ለሆጦም ኣተፈቀው ምስሉምኩ፤ ለሰብ ንዋይ ላቶም መንደሊታት ኦሮትክ እብ እንክሩ ዲብ መራቀብት ኣብ ሰሚረ ትበገሰው፤

ኣብ ሰሚራመ ለሕሳብ ልቡ ዲብ ፍዕል እግል ለኣውዕል እንዴ ቤለ እት ሸቅሉ ትፈረረ፤ ምን ሐረስ እሊ ክልኤ ኣምዕል እብ ባካትለ ዑመር ለሸቄ ዲቡ ጃርዲን ክም ሐልፈ ላኪን ክም ኢትሰኣለ እ’ቡ፡ ለእብ ምስጢር፡ እብ ሰላዲ ዲብ እውዓለት ኣብ-ሰሚረ ብገሳም ለዐለው ኣጀኒት፡ ለከበር እግላ ሀድፍ እግል ልግብእ ልታዩን ለዐለ

ዑመር ኣሰኣለው። ምን ሐረስ ኣብ ሰሚረ እግል ዑመር ለሐዝዩ ወግርዩ ክም ሀለ ሐብሬ ረክበው። ሐቆለ ክልኤ ኣምዕል ለሆን ላኪን ኣብ ሰሚረ እተ ባካት እብ ረኣሱ ልግበእ ወእብ ከበሩ ኢትረኣ ወኢትሰምዐ፤ ዑመር ወሰሚረ ላኪን እሊ ወለመሰሉ መታክል ሄራሮም ሰበት ኢክርዐ፡ ሻዋም ምን ኣምዕል እት ኣምዕል እበነት ኣሳሱ እንዴ ትትወተድ ወእት ሰብት መጽኢት፤ ለወቅትመ ኣምዕሎታት እግል ሳምኖታት፡ ሳምኖታት እግል ኣውርሐት ወኣውርሐትመ እግል ሰኖታት ዲብ ለኣትሻክት ጌሰ፤

ንዌት ኣብ ሰሚራመ፡ ወእግል ዶሉ ትግበእ ወእግል ዲመ፡ ወእሲቱ ትምክሩ ወኖሱ ለኣሰተቅፍር፡ ወኣዳም ልፍረህ ወረቢ፡ ሐቆለ መደትለ ሰልፍ ሐጸዩ ወመትነሃፉ በርደ ከክምሰል ምድገ እሳት

ድግልት መሰለ፤ እት መግልሱ ላኪን “ሸረፍክ ለኬደ ምን ክዶድ ሸረፉ ወሕሸመቱ ሐር እግል ቲበል ኣለብኩ። ኣፌት ገበይ ራትዐት እንዴ ልርእዩ እንዴ ሐድገዩ እብ ጎጽ ወእብ ረዐዳብ እንዴ ትላወሸ እብ ምስምሰ ፈቱክወ ወፈቱተኒ ለመጸክ ወእግልክ ኣትሀደጊት ወዔብ ወዑረት ለወዴክ ነፈር ድ’መቱ እግል ትሸረብ ብኩ። እብ ወለትክ ለልትመልጠጥ ምንክ ልባሰ ሕሸመት ኣሰሩ ክም ሕ’መት ከሌዕ ኢተርፍ ምንኩ። ክም ወዴክ ለኢትወድዩ ክም እብ ሞላድ ሐሴካቱ!” ለትብል ዘዐት ልትገረር ሰበት ዐለ፡ ለኣሪም ወለኣቅርብ፡ ለኣከይ-ደሚሩ ዲብ ኣካኑ ክም ሆለ ለለኣክድ ዐለ፤

ሰሚረ ወዑመር እብላሆም ኣክለ ሐር ጌሰውክ ቅርድ ሻዋም ምስግር ምድር እንዴ ገብእ ኣተላለ። እት ምግብ ላኪን፡ ውሒዝ ዔረ ዲሶም፤

ትተላሌ.....

ቃኑን መምተልካት

ምን ገጽ 3 ለተላሊ....

ዲብ ኣርድዮቱ ለሸበ ኣቅሹን ኣው ኣቅሩድ ህዩ እንዴ ኢልትሰኣል እግል ልብተኮ ቀድር። እት መዓል ቤት ለልውዕል ማይ እት ኣርድዮቱ ምንለ ልትረከብ ማይ ምን ጽብጣይ ኣርድዮት ላቱ ጎሩ እግል ለኣጅዝ ህዩ ልትቀሰብ። ክምሰልሁመ እግል መሰኖ ኣው ሀደፍ ብዕድ ማይ ለለትሐዝዮ ጽብጣይ ኣርድዮት፡ ምንለ ምስል ኣርድዮቱ ለልትሓደድ ማይ እግል ልትዓወን ዲብ ምድር ናይለ እት ግንራራብ ማይ ለሀለ ጎሩ ለለትሐዜ ወራታት እግል ሊዴ ቀድር። እሊ መሰል ወራታት እግል ሊዴ ኣው እግል ለኣሰኔ ህዩ ዲብ ክምእነ መስል ግዋረ እግል ልኢቱ ሐቅ ቡ። ለኣርድዮቱ እት ግንራራብ ማይ ለህሌት ጽብጣይ ኣርድዮት ዋጅብ ከሕሰ እግል ልጥለብ ህዩ ሐቁ ሕፉዝ ቱ።

እት ረኣሰ እሊ ለገብኣ ጸብጣይ ኣርድዮት ህዩ ዲብ ኣርድዮቱ እምበል ሰሚሕ ለትኸሰሰ ጀህት ኣርድዮት፡ ዝያድ 100 መትር ለቆሪሁ ሐፊር (ዔለ) እግል ሊዴ ኢልትሰመሕ እሉ።

እሰባት ምልክዮት


ጸበጥ ዲብ ለልትሐረክ መምተልካት፦ ምሮ ለልትሐረክ መምተልካት ለጸብጠ ነፈር ቃኑን

ክም ሚልካይለ መምተልካት ቱ ወግም ለልሀይቦ። መቃብል እሊ ለተሀደገ ናይ ቃኑን ጌማም ድድ ጽብጣይ መምተልካት ለትቀርብ ለገብኣት ቅራመት ላኪን ለሐቅ ጠልብ ሀለ ነፈር እሰባት እንዴ ቀደመ እሊ ናይ ቃኑን ወግም ራቴዕ ክም ኢኮን እግል ለኣፍህም ጸብጡቱ።

ሰነድ ምልክዮት ዲብለ ኢልትሐረክ መምተልካት፦ እብ ናይ እዳረት ሰብ መዝ፡ ኦሮ ለኢልትሐረክ መምተልካት እግል ኦሮ ህዩብ ላቱ ነፈር ክም ወጅቦ ለተሀዩበ ሰነዳት ምልክዮት፡ ለነፈር በዐልለ መምተልካት ክምቱ ቃኑን ወግም ለሀይብ። ምናተ ዲብለ ተሀዩበ ሰነድ እሰባት ለለሀሌ ናይ ምልክዮት ወግም እብሊ ተሌ ኣሰባብ እግል ልፍረስ ቀድር።

- ሰነድ ምልክዮት እብ ኣሳሰ ቃኑን ለኢተሀዩበ ዶል ገብእ ኣው ሰልጠት እብለ ኣለቡ በዐል መዝ ለተሀዩበ ዶል ገብእ፡ ኣው
- ሰነድ ምልክዮት እብ ኣሳሰ ለኣለቡ ኣፍዓል ለተሀዩበ ዶል ገብእ ኣው
- ሺክያይ ምልክዮት ናይለ ኢልትሐረክ መምተልካት ለረክበ ዲበ ዕለት ሐቆ ሰነድ ምልክዮት ለትዳለ ዲበ ዕለት ዶል ትገብእ።

ልተላሌ.....



ካልኦይ ጅግረ ኩልያት ዐድነ አንበታ

እብ መሕበር ወጠን ሸባባት ወደረሰ ኤራትሮፕ አቅሊም ሳወ ወኩልያት ተዐሊም ውቁል እንዴ ትዝመ ለገብእ ጅግራታት ርዶደት ኩልያት ዐድነ አንበታ።

እብ ሰነብት ዕርፈን እንዴ አትመመዩ እት ድራሰት ብጉሳት ለህለዩ ኩልያት ዕሙማይ ሕክምነ ወሕክምነ አንድብ እርተ ምስል ፈሪቅ ኩልያት ዕሉም በሐር እት መዲነት ባጽዕ ለትጋዩስ ጅግራታት እብ ካልኦይ ገጽለ ትልህዩ አንበታት።

እምበል እት ኩረት እግር ተብዕን ፈሪቅ ኩልያት ዓፍዮት እርተ ዕዉት ዐለ።ትልህዩ ደጋይግ ሐድ ክም ጌሰ ምነ ፈሪቅ ኩልያት ዕልም በሐር ሪጎሌ ምንመ ረክበው። እግል ልትነፍዖ እብ ኢቀድረው። ምናተ ሐበን ፍጹም እት ዓይት ደገገትለ ትልህዩ ሚርሒት ጸብጠትትልህዩ እብ ሚርሒት ፈሪቅ ዕሉም በሐር 5 እብ 1 ተመት።

እት ትልህዶታት ፕሊሶል ወባሰኬት ሶል ርዶደዩን ኩልያት እርተ እብ አንስ ወተብዐት ተዐወተው።

እሊ ምን ዮም 30 ማርሰ እንዴ አንበታ አሰክ ዮም 2 ኣፕሪል ለልተላሌ ጅግራታት ርዶደት ኩልያት ዐድነ። ‘ዝናርን ዕልም ወግርመትነ ብዝሐና’ እብ ትብል ሰቅራት እት ኩልያት ትጃረት ወእቅትሳድ ሐልሐሌ ለገብእ መሀረጃን ኩልያት እት ጌማም ለኣታ ቱ።



ፕሪመርሊግ እንግሊዝ

ፈሪቅ ቼልሲ መርበይ ዐውቴ ጸብጠ

እተ ለሐልፈ ወክድ ምስል ፈሪቅ ሊቨርፑል ለተልሀ ፈሪቅ ቼልሲ እብ ናይ ሕበር ዐውቴ 1 እብ 1 ትልህደሁ እንዴ አትመመ እግሊ ትመጽእ ለዐለት ትልህዩ ፍንጌሁ ወፍንጌ ፈሪቅ አርሰናል ለትገብእ እት አኖካይ ፍሩር ዐለ።

ፈሪቅ አርሰናል እብ ፈሪቅ ዋትፎርድ እንዴ ትቀለበ ሰለስ ንቅጠት ወመዐነውዮቱ እንዴ ከሰረ ምስል ፈሪቅ ቼልሲ ለወድዮ ትልህዩ ክምስለ እት ወሬሕ ሰዕ ለሳደፊዩ ቅልብ ምኑ እግል ልንገፍ ለትትቀደሩ ሒለት እግል ለአክብ ምንመ ጀረበ

ኢተዐወተ።

ፈሪቅ ቼልሲ ምስለ ዐለት እግሊ መዐነውዮት ምን ሚርሒት እንዴ አትረፊዩ መርበይ አሰክ ዐውቴ ክም ህለ እግል ለአክድ ሰበት ዐለት እግሊ እግል ፈሪቅ አርሰናል 3 እብ 1 እንዴ ቀልበዩ። ሰለስ ንቅጠት ነዘዐ ምኑ። እብል ትልህዩ እሊ ህዬ ፈሪቅ ቼልሲ እብ 59 ንቅጠት እግል ፕሪመርሊግ መሬሕ እት ህለ። እብ ግራሁ እብ 9 ንቅጠት እንዴ ደንገረ 2ይት ደረጃት ለህለ ፈሪቅ ቶታንግም ቱ። ግራሁ ፈሪቅ እት 3ይት ደረጃት ለህለ ፈሪቅ ማንሲቲ እት ገብእ። እብ 49 ንቅጠት ልተለዩ ህለ። ፈሪቅ አርሰናል እብ 47 ንቅጠት እት ራብዐይት ደረጃት ልትረኩብ። ግራሁ ለህለ ፈሪቅ ሊቨርፑል። እብ 46 ንቅጠት እት ካምሰይት ደረጃት።



ፈራዕን መስር ትቀለበው

እግል ዝዶድ ወሬሕ እት ጋቦን ገብእ ለዐለ ጅግራታት ካስ አፍሪቀ ሰነት 2017 ለሐልፈት ሰንበት ዐባይ ዮም 4 ፌብራይር እት ፍንጌ ፍሪቅ ካሜሩን ወምስር ለገብእት ትልህዩ ተመ።

ለጅግረ ሳዐት 10 ናይ ላሊ አንበተኑ። እለ ትልህዩ እለ እብ እሕትፋል ረሰሚ እንዴ ተሌት ርኢሰ ጋቦን ዐሊ ዮንጎ ለልትረኩብ እቶም መስኦሊን ፈደሬሽን ኩረት እግር አፍሪቀ ወዐለም እግሊ እት ሚዳን እግል ልተልሀው ክፋዮም ለዐለው መተልህዩት እንዴ ትሳለመው መጋሲቶም ክም በጽሐው ትልህዩ አንበተኑ።

እተ ናይ ሰልፍ ወክድ እት 1፡31ካልኢት መተልህዩት ፈሪቅ ምስር አፍዮት ከዋ 18 ናይ ጎል ካሜሩን ባጽካም ምንመ ዐለው። ሐሊተ ሐዋኒት ለዐለት ኩረት እብ ቦርተሌ ትጸበጠት ከመክት።

ትልህዩ እብል ገበይ እለ እት ሐንቱ መራቀቡት መተልህዩት ፈሪቅ ምስር አትዮት ሰበት ዐለት እት 21፡15 ካልኢት መተልህዩይ ፈሪቅ መስር መሐመድ አልኔኒ እብ ድገለባይ እንክር እት ቦርተ እንዴ ቀርቦ ለሸክዐዩ ኩረት ቦርቴሌ ካሜሩን እንዴ ሸርመት እት ሸግዒት ካሜሩን ትወሸቃት። እብሊ ህዬ መተልህዩት መስር እብ ፈርሐት ሐሊት ወሰከው መሰጅዐትመ እት ዐድ ወክርጅ ሐሊብ ሰተው እብ ድዱ ህዬ መተልህዩት ካሜሩን እግርም ክምስለ ማይ ማልእ ወክክ ወክክ እግል ሊባል ምኖም አንበተ።

ትልህዩ እት 31 ደቂቀተ መተልህዩይ ካሜሩን ሰበት ትደምዐ እምበልሃመ



አዋይንሊ ኩረት ሰበት ደዐጅቡዩ ምን ምግብ ሚዳን እንዴ ትጸወረ ፈግረ እግልሚ ፈሪቀ በክት ቅልብ ለቡ ሰበት ኢመስለዩ መስል ዐለ። “በደል ቀለበው። ደዐልኩ ወሐመምኩ” ለተአሰምዕ ዕንቤዕ እት ኣክር ሰበት ደራገጋ ቱ እግል ልትአ’መር ለቀድረ።

ትልህዩ እብላህ እት ተአተላሌ መስር እዴ ዐባይ ጸብጠት ዐለት። 62% ለትልህዩ እት እዴህ እት እንተ ዕርፍ ፈግረው።

ግረ ዕርፍ ትልህዩ ምን እዴ መስር እንዴ ትፈርቀቀት እት እዴ መተልህዩት ካሜሩን በርደት። እግልሚ። ካሜሩን አግደ እት ትልህዩ ተቅዩር ለወደ አብብክር እንዴ ትቀየረ ሰበት አታቱ።

መተልህዩት መስር ክምስለ ቀደም ዕርፍ ለዐለት እግሊም መቅደረት እግል ለአርኡ ምንመ ኢቀድረው። ሐት ሐቱ ዶል እት ከዋ 18 ኩረት ረክብ ዐለ እግል መስል እት 48 ደቂቀተለ ትልህዩ ለትረከበ በክት እግል ልትጎፊዕ እብ ኢቀድረ ፈሪቅ መስር።

ግረ ዐስር ደቂቀት እሊ በክት እሊ መተልህዩት ካሜሩን ለረክበው ኩረት እብ ቴሱትት እት ሸግዒት መስር ሰበት ዓረፈት መተልህዩት። መሰጅዐት። ክምስልሁመ እመራም መተልህዩት ካሜሩን ሒለት ለአውዴት ዐለት እሊ ጎል እሊ ህዬ እብ ዋድሕ ኩረት ምን እዴ ምስር እት እዴ ካሜሩን ለከፊተ ሰበት ዐለት። ኩረት ካሜሩንጽት ትበደለት።

እት 65 ደቂቀተለ ትልህዩ ሰብሒ ረመዳን እንዴ ትቀየረ አተ። ትልህዩ እግል ዶሉ ተቅዩር እግል ተአርኤ ምንመ አንበተት ምን እዴ ካሜሩን ለትበልሰ ደዐለት።

እት 69 ደቂቀተለ ትልህዩ ዕልብ 5 መተልህዩይ ፈሪቅ ካሜሩን ፋውል ሰበት ወደ። ለናይ ሰልፍ ከርት ቢጪ ነሰኦ።

ህጃማት ካሜሩን እብ ትሉሉይ ልትርኤ ሰበት ዐለ። ትልህዩ እብ 64% ምስል ካሜሩን ክም ህለት እኩድ ዐለ።


እት 78 ደቂቀተለ ትልህዩ መተልህዩት ካሜሩን እግል ትኣቱ ለትወጅብ ጎል ምንመ ሰሐተው። ግረ ዐስር ደቂቀት እሊ ጀርቤ እሊ እብ እንዴ ትቀየረ ለአተ አብብክር መተልህዩት መስር እንዴ ሰዋረ ጎል እግል ለኣቱ ቀድራ እብሊ ህዬ ካሜሩን ተዐወተት።

መተልህዩት መስር ካስ ምን እዴህም ክም ትመልሐጠ ሰበት አመረው ማሽጋም እት እንቶም ትልህዩም አተላለው። ለመጻ ተቅዩር ሰበት ደዐለ ህዬ። ትልህዩ 2 እብ 1 ሰበት ተ’መት ፈሪቅ ካሜሩን ካስ አፍሪቀ ሰነት 2017 እንዴ ነሰኦ ሻምፕዮን አፍሪቀ እግል 5ይት ዶሉ ጋብእ ህለ።

እግል ደረጃት ለገብእ ጅግረ ህዬ። ፈሪቅ ብርኪኖፋሶ እግል ፈሪቅ ጋና 1 እብ 0 እንዴ ቀልበ 3ይት ደረጃት ጸብጠ።

ቦርቴሌ ፈሪቅ ምስር ለሐሰ ቦርተ ትበህለ። ለሐሰ መተልህዩይለትልህዩ ወ ክ ም ሰ ል ሁ መ ለጅግረ ምን ፈሪቅ ካሜሩን እንዴ ትሐረው ጃእዘት ነሰኦው።





ለኢትዮጵያ መሰላት ማርጎሪ: ሐቴ ዶል ለነብረት ወክልኤ ዶል ለትቀበረት እሴት



እንግሊዛይት ላት ማርጎሪ ምካል፡ እት መአንበት 18ይ ክ/ዘ እት ቅብለት አየርላንድ መዲነት ሎርጋን ትኅብር ለዐለት በዐል ጼወዋተ።

ማርጎሪ ስድፈት ሐቴ አምዕል ጽጋዕ ክም ሐ'መት እግል አርበዕ ዮም እት ቅድብ ኦቴት። ሐቆ እለ ሀንደጎት ልበ ሰበት በዋራ፡ ለእብ ሰአየት ልትጸበሮ ለዐለው ጆን ለልትበህል ብእሰ ወአጀኒተ እት ሐዘን ወገህይ አተው። እብላሆም ህይ አቃርብ ወፈተች እንዴ ትጀመወው፡ ግናዘቶም እግል ቀብር አዳለው። እተወቅት ለህይ እተ ዐዶም መቃብር እንዴ ሐንፈለው ክም ካትም ወብዕድ ሰርጎ ለዘምቶ ሸፍተ እት በዝሐ ገይሶ ሰበት ዐለው ፡ ጆን ቀደም ዓደት ቀብር፡ ለእት ጭብዕት እሴቱ ለዐለት ናይ ህዳዮም ካትም እግል ለአፍግር ምነ ምንመ ጀረቡ፡ ካትም ርሐ ከልአቱ። ለቀደም ሞተ ፋይሐት ዲበ ለዐለት ካትም እብ እብዮተ ጆን ሰኒ ተዐጀቡ። ለመ ብዕዳም አቃርብ ለካትም እግል ለአፍጉረ ጀረበው ላኪን ጀርቢሆም ሐቴ ኢወዴት። እት ኣክር ኡብ ዕያለ ላቱ እት ለትናብዕ “እዘሞ ምነ እለ ካትም ለእበ ተአቤ ህሌት ሳክት ኢኮን አማነት እሴቹ ትሸርሕ ህሌት” ቤለዮም ወአዝመው ምነ። ዓደት ቀብር ማርጎሪ ተመት። ቅሰትለ ካትም ክም ትሰምዐት ህይ ለሐዘን ዝያድ መርር እት ህላ፡ እግለ እተ ዳዋይሕ ለአንጎጉ ለዐለው ሴርቀት ላኪን ብሸራት ዐለት። ምሴተ ለሴርቀት ለካትም እግል ልንሰአ ቀብር ማርጎሪ ሐፍረው፡ ምናተ ለእምን ካትም ምን ጭብዕት በዐልተ መትባልሐት አቤት። ለፈርሀት ረቢ አለዮም ሴርቀት እብ ሰኪን ምስለ እግል 15 ሰነት ለታሌተ ጭብዕት ቀርጨው ወነስአው። መውዲ እንዴ ሰምዐው ለመጸው ዒቅበት ናየ መቃብር፡ ግናዘት ለይአለቡ ቀብር ማርጎሪ ወእናስ እተ መጦሩ ማይት ጸንሐዮም።

“ያሬት ለካትም እለ ወተርፈተነ

” ልብል ወክም ዕዩን ልተህላፈት ለዐለ ካልኣይ ሰራቅ ክመ ሐበረዩ፡ ለሴርቀት ጭብዕት ማርጎሪ ክም ቀርጨው ስድፈት ዕንታተ እንዴ ፈትሐት ምን ቀብረ እንዴ ፈግረት ሳይሞክ መጤቶም ወሰንደልደል እት ትብል ክም ጌሳት ወለሰኪን ጸብዋ ለዐለ ሰራቅ እብ ድንጋጽ ክም ሞተ ወድሐ እግሎም። ለዒቅበት እበ ሐሰለት ሓለት እግል ልእመኖ ኢቀድረው። እግለ እት አዴሆም ለዐለ ሰራቅ ህይ አስክ ቦለስ ትብገሰው እቡ። አዜመ አፈ ባብ ናየ መቅበረት ክም በጽሐው ብዕድ እግል ቅንጽት ማርጎሪ ለለክድ ከበር ሰምዐው። አሮት ቅርረት ከምረት ለጸብዋ ሰክራን ሰንደልደል እት ልብል፡ “አነ ሳክር እግል ህሌ እቀድር ላኪን ምን እለ መቅበረት ግናዘት ሃርበት ምንኩም ክም ህሌት ሸክ አለብዩ” ቤለዮም። መትዐጃብ ዒቅበት መቅበረት ረሸመቱ በጽሐ። ምን ናየም ለለክኪ ላኪን ናየ እተ ፍራሽ ለዐለው አቃርብ ወዐድ ማርጎሪ ቱ። ባብ ዐድ ጆን ክም ከርከሐ፡ “እሴቹ እብ ሐያተ ምን ተዐሌ እለ ጆንስ ክርከሐት ናየ ክም ተ ወመሐልኮ” ቤለዮም፡ ጆን እሴቱ እት ልትፋቀድ ወለባብ እግል ልፍተሕ እት ገይሱ። ያሬት ወይፈትሐዩ ላኪን!!ጆን ለባብ ክም ፈትሐ ለቀደም ገሌ ሳይታት እግል ዲመ ለሳርሐዩ እሴቱ፡ ብላይ ከፈነ እብ ጨበል ወቅጠር ደም እንዴ ትመንክለ ወጭገረ እንዴ ትነፈሽ እት በዋር ክም ጸንሐቱ እብ ድንጋጽ እት ቀደመ በህ ቤለ ወእለ እግለ ዱሊት ለዐለት ሕፍረት ህቱ ትቅበረ ዲቤ። አቅበሎት ማርጎሪ ምን ሞት፡ አርወሐት ብእሰ ምንመ ለከመ እግለ ላቱ ዕምር ዋዉል ገብእ እግለ። ውላድ ውላድ ውላድ እንዴ ርኢት እት 98 ሰነተ ሞተት። ህተ እት ቀርቀረት ሞት እት ህተ፡ “እለ ጽንዕት ካትምዬ ምን እዴዬ ኢተአፍጉረ፡ ምን አመረ አሮት በዐል አክይበክት ሰራቅ እግል ልሰረቀ እንዴ ጀረበ እት እዲነ

አቀብልመ ኢኮን” ቱሎም ወናይ ደንጎበ ህግየህ ገብአት። ውላዳመ ምን አመረ እግል ኢትቅንጽ እንዴ ቤለው እንዴ ኢቀቡረ ሰለስ ዮም እንዴ ትጸበረው ቀብረው። እት ረአስ ቀብረ ህይ “ሐቴ ዶል ለነብረት ወክልኤ ዶል ለትቀበረት ማርጎሪ ምካል” ለልብል ክቱብ ክትብው። ቅሰት ማርጎሪ እተ ደዋይሕ ሰኒ ሰበት ትነሸረት፡ እንዴ ገዝ ቀብረ ለሐፍረ ሰራቅ አለቡ።

ዐለምነ አምዕልክ ለለአተዐጅቦ ለትፈናተው ሐዳይስ ዐጃይቦታት ለልትረከቦ እተ ምንማተ፡ ዐደድ ለይአለዮም አስክ እለ እግል ልትፈትሐ ለኢቀድረው ምን ዐቅምነ ወለዐል መስኣላት ክም ህለው ምትመራምረት ለአምኖ። ገሌ ምኑ ምስጢርለ ስድፈት ምክራዮም ለትቀዌት አንፋርቱ። አሮት ምስልክ ለጸንሐ ነፈር ስድፈት እት ናይ በል-ሸም እምበል አሰር ምክራዩ ዶል ትቀዌ ምንክ ሚ ወይልክ?

ጄምስ ዋርሶን፡ አብረሃም ወሂመርሶን ለልትበህሎ ሰለስ መልሂት፡ እት መዲነት ዋርዊክሻየር ዐድ ኢንግሊዝ፡ እት አካን ከምረት ልትፋግዮ ሐቆለ አምሰው፡ አስክ ቤቶም ትብገሰው። እት ገበይ እት ህለው፡ ለእት አያም ንእሹ እት ሰዐይ ፈዳብ ለዐለ ጄምስ፡ እግለ ክልኣት መልህዩ “አነ ምን ሚኒንግቶን አስክ ኮቪንተሪ እንዴ ይዓርፍ እግል ሄርር እቀድር”ቤለዮም። አብረሃም ሂገ ጄምስ ናይ ሰከር ሰበት መሰለቱ “ጊስ ሰክራን ከፎ እንዴ ወዴክ እንዴ ኢተዓርፍ 60 ኪ/ሜ ትሄርር” ቤለዩ። ጄምስ ‘ሰክራን’ለትብል ዘዐት ሰበት ወጅዐቱ፡ ምስለ ክልኣት መልህዩ እብ 300 ፓውንድ ትጸበጤ፡ በህለት ህቱ ቀደምም እግል ልሄርር ወህቶም እት ካሮ እንዴ ገብአው አሰሩ እግል ልሄር። ህቶ መ አተፈቀው ወሄራርም አንበተው። ጄምስ እግለ ሰልፋይት 4 ኪ/ሜ ምስሎም እት የንድን ሄረረዮን። ስድፈት ላኪን ተዐንቀፈ ወወድቀ። መልሂቱ እት ልሰሐቆ እግል ለህሩሱ ክም ትከረው ላኪን እት ምውዳቁ ኢጸንሐዮም። ምንለዐሌሆም ላኪን “ነስኡኒ ህለው” ለልብል መሪር ናይ ርድኡኒ ጽርሓት ጄምስ ሰምዐው። እብ ሐብሬ እተ አከንለ ሓድስ ለመጸው ፖሊሱ እግለ ጄምስ ለወድቀ እተ አከን ወደዋይሐ ምንለዐል ሳምን ለገብእ ፈተሸው። ምናተ ለገብእ አሰር እግል ልርከቦ ኢቀድረው። ላመ እበ ልሄ’ሮ ለዐለው ጽርግዩ ናይ ምስግር አው ሕፍረት እሻረት ይዐለት ዲቤ። መስኣለት ጄምስ አስክ እለ ዮም ፍትሕት ይህሌት።

ሸዐብ ወክሞደ

እት ለትፈናተ አካፍት ለልትረከብ ናይ በዲር ክቱቤ እብ ክሰስ ኬትቡቶም ወእት ወቅቶም ለዐለ ዓዳት ወለመድ ብዘሕ ሐብሬ፡ ክም ለህይደ እመርቱ።

አሮት ምን እለ ጆንስ ክቱብ እለ ህይ እት ረአስ አቅብር፡ ምስል ዕለት ሚላድ ወሞት ናይ ማይት ነፈር ለልትጨመር ክቱባት ነኣይሸቱ።

እለ ክቱብ እለ ምን ሚዶል ክም ተአንበተ እመር ምንመ ኢኮን ሰኒን ዋዲ ክምቱ ወድ ቢን አደም እግል ዲመ እግል ልምበር ገዮት ክም ቡ ለሸርሕ ክምቱ መኤምረት ሸርሐ። እለ፡ ለማይት ኖሱ ቀደም ሞቱ ለክትብዩ፡ አው እብ አቃርቡ ለትክተብ እግል ልግበእ ቀድር።

እት ቱርኪ፡ ምን ኢያም መምለክት ዐትማንዩን ለአንበተ፡ አዩ ቀብር ምን ብራሁ ምን ቅብር እቱ ክም ህላ፡ በህለት ጆንስ ወምህነት ማይት እግል ለአፍህም ለቀድር ለመድ ህላ። እግል መሰል ለማይት ተብዐት ገብእ ምን ገብእ እት ረአስ ቀብሩ ተምሳል ጣዋየት አው ዕመት ከሩ። አንሰይት ገብአት ምን ገብእ ህይ፡ እብ ዕንባብ ለትሰርገ ተምሳል ልብ ከሩ በህለት። ምህነት ማይት እግል ወድሐትመ ለክምሰልሁ ኬትባይ ዐለ ምን ገብእ፡ገለም፡ ጆንዲ ዐለ ምን ገብእ መንዱቅ ወለመሰሉ ከሩ እግለ።

እት ረአስለ አቅብር ለትፈናተ ክቱብ ህላ፡ እግል መሰል ፡ ምስል ቁርኣን ለልጸበዮ፡ ሞት ሊተርፍ ክምተ ለሸርሕ ኢያት፡ ዐመል ሳልሕ እግል ንዕመል ለለአፍህም ምን ዲን ለትብገስ ክቱብ እንረክብ። እተ ክምሰልሁመ እት ረአስ አቅብር ሰብ ተአሪክ ለልትክተብ ተአሪክም ወመስኡልዮቶም ለሸርሕ ክቱባት ወቀርት ዲብ ለትሰትፈናተ ቃራት ልመድቱ። ገሌ ምኑ ምን እንርኡ እለ



ለተሌቱ፡
“ እዲነ እብ ተማመ ለኢቀድረቱ አሮት ቀብር ከፎ እግል ልቅደሩ”
እስክንድር ዐቢ
“ ፋርስ መእከይ ወሰላም፡ ምን አጅል ሰላም ለነብረ ወምን አጅል መሰጥሩ ለሞተ” **ርኢስ መሰር ለዐለ አንዋር አልላፍት**
“ ነበር ሞዐምቱ እፈቱኪ ዐለም” ስሙይ ሻዕር ዐረብ መሓመድ ድርዊሽ
“እብ ሰብ ውዳይ አብዬ ለረከብከውቱ” ኬትባይ ዐረቢ ላቱ አቡ አልዓላእ አልሙተኪ፡ እግል ልትወለድ ወእግል ለሙት ሕርዮ ክም ይዐለ ለሸርሕ፡ እት ረአስ ቀብሩ እግል ልትወቀር ለትፋነ እቡ ቃላቱ።
“ዎ ካልቅ . . “ ጋንዲ

ቅሰት ሱረት

ምን ኣሎም እት ሸዋርዕ እት ለአንጎጉ አዋልድ ለሻቅሎ አንፋር ሐቆ እንተ አስክ ቻይነ ኢቲጊሱ። እግልሚ በክት እለ እት ሱረት እንርእዩ ለህሌነ ሻብ ኢልብጸሐከ።

እት ቻይነ፡ እት ሸዋርዕ አዋልድ ለሻቅሎ ወለለኣትዕቦ አንፋር፡ እብ እዩሳም እንዴ ጸበጠው፡ እብሊ እትለ ሱረት እንርእዩ ለህሌነ አሰሉብ አምዕል ታመት ዐቅባም ልውዕሎ። አፍ ጅሙል ጭንጫይ ኢለኣትዩ ለትብል መሰል ትግሬ ምን እለታት ብህልትተ።

